


國朝柔遠記





國

遠

十

翰

訖

壽

集

二

光緒十七年夏
五廣雅書局刻

嘗謂惟聖知幾亦惟聖因天天之欲合四海爲一家也幾
早見於康乾之世幾見而先覺者我

聖祖仁皇帝

高宗純皇帝也因天而弗違者我

文宗顯皇帝也康熙三十三年俄羅斯遣使來朝

上諭外藩朝貢固屬盛事總當以牧甯中國培養元氣爲根本
乾隆四十一年刑部奏駁李質穎讞英商獄不得其平傳
旨申飭反覆數百言

兩聖人燭微洞遠若皆逆知後世之有洋務者非知幾其神乎道
咸間海氛亟矣

文宗顯皇帝獨決大計社稷轉危爲安得以全力蕩平髮捻而海

外各國亦化干戈爲玉帛非因天弗違乎士大夫生當其
世出顛隳享承平上下數千年縱橫九萬里胸中不能無
感慨有感慨斯有論列有發明此柔遠記之所由作耳記
凡二十卷編年繫月採輯至當將使讀者於通商大局知
其所原起知其所滋蔓並知其所究竟甚盛心也雖然事
之原起當所聞世事之滋蔓當所見世而事之究竟則尚
在未來吉凶悔吝變動不居至可喜亦至可懼懼將奈何
心

列祖

列宗之心而已矣心

列祖

列宗之心奈何自治其內而已矣十數年前人事之杌隉旣以因天心而挽回數十年後天心之福禍又將因人事而旋轉理固有可必者記有之日月所照霜露所隊凡有血氣莫不尊親在古人原非託諸空言在我

朝尤可見諸實事何以驗之卽於梯航重譯之十數國驗之蓋莫不尊親之幾已倪也於此時果能極深研幾以承天貺所謂柔遠人四方歸之

盛業不可以是編爲左券之操也哉

光緒八年歲次壬午仲夏月臣譚鈞培謹敘

國朝柔遠記敘

柔遠一書

臣

友王之春所輯也之春以文人兼武事馳驅

江海間防北塘駐京口遊歷日本長崎橫濱於中外交涉事見聞周洽暇則博稽

國朝掌故凡有關於遠畧者提綱摘要殫歲月之功成爲是書誠撫遠之宏圖綏遠之良策也夫秦漢而還多事四夷往往兵連旣結爲累世隱憂卽勒石燕然山繫單于頸致闕下而財窮力竭得其土不可治得其人不可臣隋珠彈雀之誚所難免焉至若兩晉南宋已事率皆君臣翫泄養癰貽患自小其朝廷史冊所書千載下讀之猶令人髮指其罪烏可貸哉昔宣聖與魯君論文武之政於遠人則曰

柔誠以遠人不可遽慌之以威也遽慌之以威則彼必震動不安又不可故示之以弱也故示之以弱則彼必狡焉思逞此而求一至善不易之經則非柔不爲功且夫柔之云者非我之自處於柔也道在順其歸附之心而孚之以誠信則柔者益柔所謂變友柔克也化其獷悍桀黠之習而迪之以中庸則不柔者亦柔所謂高明柔克也今觀所編穆然仰見

列祖

神宗聲教四訖廣乾坤覆載之恩宏遐邇一體之量揚丕冒之仁於囹外消反側之萌於無形用能梯山航海視遠如歸腹詠心歌無遠弗届雖其間或剿或撫或戰或和不必盡歸

一致而變通盡利要皆範躍治之金淘汰之以適於用閑
出林之虎馴伏之以安其常蓋自文武以後柔遠之政未
有若是之盡美盡善可以行久遠而無弊者臣奉
命巡視長江兼閱海防屢欲彙纂我

朝懷柔遠人之謨宣布

皇仁於中外且舉數百年來先後任事諸公成敗得失之數藉
資法戒期於臨事而不惑而簡練務煩苦無暇晷此書實
先得我心之所同然者故序以行之之春年甫強仕喜著
書皆切於時務異日才猷愈老識見愈深文章經濟當更
有進於今茲者則是書特其嚆矢耳

光緒八年仲春上浣

臣

彭玉麟謹撰

古今之國勢自唐虞三代至秦而一變井田封建諸法蕩焉無存此一時也自漢唐以後至

國朝道咸中而又一變舉際天並海從古不通中華之國並梯山航海重譯來同此又一時也斯二者皆天也雖然天不變道亦不變蓋至變中有不變者存焉論者僉謂天主耶穌諸教自明季闖入中土愚奪吾堯舜孔孟之席吾謂不然蓋不特彼教不能奪吾堯舜孔孟之席且深幸堯舜孔孟之教將盛行於彼都而特自今日始何者堯舜孔孟之教爲天地立心爲生民立命乃乾坤所繇以不敝者也天地之生人爲貴薄海內外諸國皆人也皆可與入堯舜孔孟之道者也特自古不通中國又相去數萬里禮聞來

學不聞往教故不知有聖人未得聞其教耳天誘其衷以
互市故朋遊於中土而漸近吾禮義之教自當幡然大變
其故俗尙何慮其奪吾堯舜孔孟之席哉中庸不云乎惟
天下至誠爲能盡其性則能盡人之性性能盡物之性物之
性且當盡況異域同在並生並育之中若聽其外聖教而
終失其性何以贊化育而與天地參乎天心仁愛聖人有
教無類必不忍出此也聖人之道譬如天地之無不持載
無不覆幬是以聲名洋溢乎中國施及蠻貊舟車所至人
力所通天之所覆地之所載凡有血氣者莫不尊親故曰
配天此正堯舜孔孟之實錄也其曰舟車所至則今日之
火輪舟車聖賢早知之矣此聖教將行於各國之大機括

也夫聖教在中國亦以漸而及也堯舜都冀州其時惟今山西山東直隸河南陝西數行省爲中原餘皆要荒服也孔孟時吳越荆楚尙爲蠻服宋以來三江兩湖閩越黔滇川粵始大盛文學比鄒魯謂非聖教之自近而遠歟我

朝雍正中滇黔川楚兩粵諸苗獠改土歸流亦自開闢以來始沾

王化至乾隆中新疆拓土二萬里則中土業已徧覆無遺繇是
可以及外國矣然則堯舜孔孟之教蓋漸推漸遠初無一
息之停也臣友王之春有見於此爰撰

國朝柔遠記自

聖祖訖

穆宗朝凡懷柔泰西諸國之事蹟皆備紀之雖不無猗那先民之思然正以見

累朝聖人兼容並包如天之量天欲使堯舜孔孟之教自中國以施及蠻貊

列聖先天而不違故在二百年前卽已啟其機括蓋天地無外聖人無外故

列聖之包涵徧覆亦無外吾知百年內外盡地球九萬里皆當一道同風盡遵聖教天下一家中國一人之盛其必在我

朝之

聖人無疑矣目下泰西諸國皆能識華文仿中制譯讀四子五經書丕變其陋俗英國近有比遞斯尼教以躬行實踐爲

宗此卽堯舜孔孟之正教也彼其所謂天主耶穌希臘諸
教已自悟其非而遷喬出谷矣豈非自然之氣機動於不
自知

列聖早已啟其端哉之春又以己意撰蠡測卮言十三篇曰慎約
議聯與國廣學校精藝術固邊防修船政興礦利防漏稅
強兵力練民團禁販奴編教民論鴉片皆時務切要之言
語曰識時務者爲俊傑反是則迂儒俗吏而已當今日之
時勢強鄰相逼而來幾成戰國之局雖孔孟復生亦不能
不因時而立制以孔子固聖之時者也孔子陳九經曰柔
遠人來百工孟子極論交鄰之道已預知今日之時事此
十三篇者皆救時之急務也雖然有本焉富強其末也孔

子曰足食足兵必要其歸於民信又曰庶矣富矣必要其歸於教之孟子曰修其孝弟忠信可使制挺以撻堅甲利兵此我中國自堯舜禹湯文武周公以來歷世相傳之本務而不可一日忘者也洋人所奉者天主然而天道之所忌彼皆犯之殘忍天所忌也洋人於火攻則精益求精於鴉片則剗鳩毒以害人充其量不至盡天下之人類不止犯天之忌一機巧天所忌也洋人無事不用機械犯天之忌二強梁天所忌也洋人則以強凌弱以眾暴寡犯天之忌三陰險天所忌也洋人吞噬兼併每蓄意於數十年前而坐收後利犯天之忌四狡猾天所忌也洋人智取術馭得寸進尺犯天之忌五忘本天所忌也洋人不敬祖先廢

宗絕祀犯天之忌六黷武天所忌也洋人恃其船堅礮利
不戢勢將自焚犯天之忌七專利天所忌也洋人上下交
征利君臣父子兄弟懷利以相接犯天之忌八奢侈天所
忌也洋人厚於自奉窮奢極欲犯天之忌九忌刻天所忌
也洋人暗分朋黨彼此猜嫌犯天之忌十然則爲洋人計
由今之道無變今之俗亦斷難必其有終故惟幡然改從
堯舜孔孟之教然後不失乎人之性而無犯造物之所忌
此堯舜孔孟所以爲天地立心爲生民立命而吾中國之
所以爲中國者在此不在彼也然則言時務者雖師彼之
所長尤當以堯舜孔孟相傳不變之道爲本務而後可與
言富強也

光緒十年甲申三月臣李元度謹敘

昔道光時有臣曰魏源著一書曰

聖武記自

開國之初用兵次第以及康熙中勘定三藩乾隆時蕩平回部備載無遺述

皇朝武功之盛以傳示後世其意至深遠也今光緒朝又有臣曰王之春著一書曰

國朝柔遠記自順治以迄於同治於中外交涉機宜以及通商始末凡所以控御八荒懷柔萬國者皆在焉視魏源之書用意尤爲深遠然源之書已風行於時而之春之書知者猶罕竊嘗受而讀之喟然而歎曰

天之所以宏覆無外而我

國家所以長駕遠馭陶六合爲一家者其將在此乎晉皇甫謐帝王世紀云自神農以上有大九州柱州迎州神州之等黃帝以來德不及遠惟於神州之內分爲九州是說也儒者或未之深信及佛氏之書出而四大部洲之說興更爲儒者所不道乃自泰西諸國通乎中夏則海外五大洲曰歐羅巴曰利未亞曰阿細亞曰南北亞墨利加曰墨瓦蠟泥加固皆舟車之所至人力之所通矣以是推之佛氏四大部洲可信而神農以上大九州亦可信夫神農以上如天皇地皇之類固荒遠難稽而伏羲都陳神農亦都陳後又都魯載籍有徵學者亦皆信之然則神農以上君臨大九州者皆吾中國聖人而四夷無與焉天下大勢合久

必分分久必合今遠人來驩視道如咫此蓋分而復合之
徵意者吾中國有大聖人將合大九州而君之以復神農
以上之舊乎世徒見其人心計之奇巧器械之精良挾其
長技凌犯我邊陲則惴惴焉懼中國之不可以爲國而不
知治天下有本有末其心計之奇巧器械之精良則天實
啟之使得以自通於中國者也皆其末也若夫其本則固
在我中國矣當孟子時有善戰者有連諸侯者有辟草萊
任土地者人人以爲得富強之策亦猶今西國之人心計
奇巧器械精良雖孟子無以尙之也孟子則一言以折之
曰盍亦反其本矣所謂反其本無他焉省刑罰薄稅歛使
仕者皆欲仕於其朝耕者皆欲耕於其野商賈皆欲出於

其塗鄰國之民皆仰之如父母如此者在孟子時不過朝秦楚蒞中國而在今日則雖統大九州而爲之君不難矣草茅微賤不足窺測

朝廷德意然竊見

聖天子精求吏治勤恤民隱一遇水旱偏災疆吏未及上聞而璽書已先下問可謂得其本矣異時德洋恩溥使東西洋皆在怙冒之中以復神農以前東西九十萬里南北八十五萬里之盛軌此一編也非其嚆矢乎愚故曰視魏源之書其意更深遠矣

光緒十有一年乙酉秋八月

臣

俞樾謹敘

語曰前事不忘後事之師也運會之變遷人事之旋轉雖智者憂深思遠不能逆料於先時而知其所究竟惟一以前事爲法戒而衷於至當不易之理則百世之下猶可以燭照數計固不事區區推測之私也易曰知幾其神中庸曰至誠之道可以前知蓋恃此矣我

聖朝

豐功偉烈厚澤深仁丕冒海隅無有遐邇乃或膺重寄者罔知大體坐失機宜往事具存前鑒不遠此王之春柔遠一書所由輯也夫閉關絕俗之說無論在今日爲迂談也卽質之三代盛王亦豈狷然自好劃堂奧而守之謂聊固吾圉云爾哉禹貢紀要荒周官有職方氏之掌明堂之位九夷八蠻如在幕庭故凡含生負氣之屬梯山航海翕然

列祖

廣至固時勢爲之不得不然者亦

列宗聲教之所訖非偶然也誠務修其德政則四海猶一家如天君泰而百體從令苟或失之則指臂之間亦驅使之所不及遑論其他乎道咸之間海氛日熾維時當事者每不諳於彼此之情形自互市以來申明條約轉危爲安而甌福倚伏之機又卽在是之春究心於當世之務獨於中外交涉緣起通商始末采摭不遺較之近時朔方備乘瀛寰志畧諸編或踳踏一隅或侈張博物皆無當於經世之實用惟是書綜稽掌故並恭錄

歷朝諭旨指示方畧黜陟人材非徒長駕遠馭之資亦考鏡

得失之林也詩曰不愆不忘率由舊章有心斯世者可以
統觀前事而深長思矣

光緒九年歲次癸未二月

臣

衛榮光謹敘

夫先王之訓耀德不觀兵止戈之文安民而和眾是以崇
密降於因壘有苗格於舞階雖近在要荒但示懷柔之意
豈遠違聲教必伸撻伐之威我

國家文德覃敷遐邇馴伏四荒四極八殞八紘舉凡山經地
志所不能詳大章豎亥所未及步者罔不重譯獻雉敏關
貢爨納牛羊稱唐帝之畜牲進燕支爲漢宮之顏色畏威
懷德者數十國薄來厚往者二百年迨夫光豐以來大肆
要求謂漢孰與我大稱兵竟逆顏行

列聖心切保民

戒深黷武

含容如地

覆嶠辟天

淮子通商重行立約因所利而利之視不勝猶勝也說者慮滋蔓難圖植荆受刺謂他族之逼處迺非種之當鋤不知魏絳和戎實深沈之至計趙范挑衅徒孟浪以貽憂景延廣劍詔橫磨范文虎舟矜遠泛卒至禍延君國傾覆全師凡此前車堪爲殷鑒或又謂虎欲雖逐象猛可馴旣悔罪而輸忱不必操之以蹙復效逆而犯順何可示之以柔歸獄於始事之人責難於養癰之後則同舟無共濟隻手何以挽狂瀾眾感出矢言殺身究何裨時局當事之苦心莫諒異時之公論自明今者回紇受盟契丹結好玉帛相見敦槃聿修固不必厯杞人墜天之憂而續江統徙戎之論然

而揚湯不可以止沸抱火懼厝夫積薪竊恐鹵莽者冀僥倖以圖功畏憚者徒因循而貽誤不懲既往曷救將來否則徒習佞盧拉丁之文僅通象譯狄鞮之語遂以華洋關涉委諸僉僉交通適與爲緣動輒得咎爰搜葺陳編考證往事自定鼎起訖同治止仿綱目編年之體就中外交涉之端詳晰編次著爲是書俾顛末盡窺得失互證冀以默消夫隱患實有難已之苦衷欲使善於約束羈縻或有裨於久安長治也夫

光緒六年歲次庚辰仲夏月上澣

臣

王之春謹敘

凡例

一此書事實自恭錄

列聖上諭及

頒發官書外并搜錄當時諸臣奏疏與名臣撰述西人圖志及各家私著可採掇者薈萃而成間有得之聞見者要必采訪確實不敢稍涉虛誣所有管蠡之見間附於後

一我

朝統一寰宇珍費之貢史不絕書是編本爲中西互市成和諸事而作其於服從最久之藩部屬國年例貢獻與夫封冊 命使 錫賚讌犒旣列王會之圖自有職方之掌不及備錄惟是 聲教所訖舟航雖直接東瀛而輪蹄亦

可徠西極所賴我內外藩服扞蔽其間攷策陳編莫非

累朝

文德所綏服

武功所或定茲取其勢有交通事相關涉者并畧識其端倪
薄海咸仰瞻

盛烈

一此書編年以紀事於當日在事諸臣仿史傳一律書名
惟意在表見事狀除本官外凡封爵諡號不及備錄至
命官授職有關洋務者並揭書以繫事

一自開國訖同治一

朝掌故惟起居所職中祕所藏不能悉窺其外間傳播

於五大洲各國交涉事實搜羅畢載

皇上冲齡嗣位聰明天亶聲靈震疊萬國梯航來者日眾容俟
采訪著爲續編故紀元以來事均未載

一我

朝幅員之廣遠邁前代其 內府皇輿全圖及各家傳刻本
並五大洲各圖皆考證所資惟各直省沿海疆界島嶼前
人雖間有圖繪恆苦畧而不詳茲特將沿海各口及臺澎
瓊州各島詳細繪列著爲圖說附諸卷末俾言防海者得
以覽焉

一中西和約內載凡與各國公文均不用夷字此編惟恭
錄

上諭並昔日奏牘未便擅改餘均遵照和約不用夷字以昭大同之盛

一此書搜輯陳編詳稽往事不過自備遺忘未敢問世而索閱者多苦不暇給遂付手民以代鈔胥至事迹糾紛不無譌漏容俟續補勘正焉

國朝柔遠記目錄

卷一

順治

卷二

康熙上

卷三

康熙下

雍正上

卷四

雍正下

乾隆上

卷五

乾隆中

卷六

乾隆下

卷七

嘉慶上

嘉慶下

卷八

道光一

卷九

道光二

卷十

道光三

卷十一

道光四

卷十二

道光五

卷十三

咸豐上

卷十四

咸豐中

卷十五

咸豐下

卷十六

同治上

卷十七

同治中

卷十八

同治下

國朝柔遠記附編目錄

卷一

瀛海各國統攷

蠡測卮言十三篇

卷二

沿海形勢畧

環海總圖

沿海輿圖

三島分圖

天下四海總圖

國朝柔遠記卷一

臣 彭玉麟恭定

臣 王之春敬編

甲申順治元年

秋七月修正歷法

初明太祖取元授時爲大統歷改太史院爲欽天監兼置回回歷科承用積久而差萬歷九年大西洋意大里亞國人利瑪竇來廣州香山澳後入京貢方物其人精推步之學士大夫皆重之自是而龐迪我熊三拔龍華民鄧玉函等後先踵至皆善天文歷算瑪竇以三十八年四月卒其年十一月朔日倉歷官推算多謬五官正

周子愚請譯迪我三拔所攜歷法諸書以資采擇禮部因奏取知歷儒臣與迪我三拔同測驗南京大僕少卿李之藻亦上西洋歷法薦迪我等時庶務因循未暇也崇禎二年五月朔日倉禮部侍郎徐光啟依西法推算與大統回回互異光啟法驗擢本部尙書督修歷法因請開局舉之藻華民玉函旋又徵西洋人湯若望羅雅谷等供事歷局譯書演算前後撰進歷書百卷後山東參政李天經代爲監督亦進歷書星屏儀晷時言歷者四家大統回回外別立西洋爲西局又魏文魁以布衣言歷徵爲東局屢測星行交倉惟天經等所推密合十六年三月朔日倉測又獨驗詔西法改爲大統歷法值

寇氛日亟未及施行明年正月李自成逼山西詔輔臣
李建泰督師剿賊命若望隨征修火攻利器行未幾賊
鋒已逼京畿建泰入保定沒於賊賊敗我 朝召爲內

院大學士若望隨至京師進所製星球日晷遠鏡并輿
地屏圖請應用諸歷依西洋新法推算七月上言敬授
民時全以節氣交宮與太陽出入晝夜時刻爲重若節
氣之時日不真則太陽出入晝夜刻分俱謬矣歷稽大
統回回舊歷所用節氣止泥夫古且北直之節氣春分
秋分前後俱差一二日況諸方乎新法之推太陽出入
地平環也則有此晝而彼夜此入而彼出之理若舊法
以一處而概諸方故種種差訛難以枚舉今以臣局新

法所有諸方節氣及太陽出入晝夜時刻俱照道里遠
近推算明列篇首開卷瞭然得旨試行乃以新法造
時憲書頒行各直省此我朝用西人治歷之始然
西洋國俗大都崇奉天主耶穌教利瑪竇來華卽奉有
耶穌經像並盛言天主爲天地萬物之主宰其徒黨繼
至者相牽和之或居京師或在各直省開堂禮拜以其
說煽誘愚眾時廷臣已有惡之請驅斥者特當事因其
歷法準驗不肯嚴爲禁絕遂使彼教流染中華議和戰
通貢市胥此濫觴萌蘖不札將尋斧柯殆謂是哉

臣

按利瑪竇之師丁氏學於歐几里

著幾何原本者

遂得私

淑幾何宗旨攜其書東來一時士大夫如徐光啟李

之藻等爲之潤色其文詞新法之行實於此始於是
熊三拔龐迪我等測驗於前湯若望羅雅谷等編纂
於後勝國祚終書成而迄不能用遭逢
聖代龍
興因其成帙用備疇人之掌遂爲一代授時改憲之
權輿記有之曰有開必先其是之謂乎至於其徒益
繁竟有藉新法以陰行其教法者則當時楊光先已
先見及之矣

遣朝鮮侍子歸國

朝鮮爲青州逾海之地舜割爲營州周以封箕子本中
國地與盛京界鴨綠江 國初天聰崇德間 王師一
再征之入其都城分畧八道諸島獲其王妃王子宗室

及羣臣家屬國王李侗委身歸命質其二子淫湫奉正朔歲時貢獻有征伐調兵護從一如明舊制後雖屢以失期違約被詰責然遺詔猶免其歲貢三之一是年以平定中原遣其質子還國免歲貢之半

其後康熙雍正乾隆

三朝屢減貢額僅存什之一

乙酉順治二年

秋八月朔日有食之 詔行新歷法

先是六月湯若望上言臣於明崇禎年間曾用新法製測量日月星晷定時考驗諸器連遭賊燬臣擬另製進呈今將本年八月初一日日食照新法推步京師所見日食分秒並起復方位圖像與各省所見不同之數開

列呈覽及期 命大學士馮銓同若望赴臺測驗與所
算合有一旨行用新法

冬十一月以意大里亞人湯若望掌欽天監事

湯若望既為監正累加太僕太常寺卿 敕賜通微教

師

丁順治四年

夏六月遣小呂宋使臣歸國

小呂宋本名蠻里喇一作馬尼刺在臺灣沙馬崎東南

距廈門水程七十二更

海中行船分一晝夜為十更
炷香為度每更約行六十里旁

多小島而小呂宋為大四周各千餘里土蠻居之明洪

武五年其使偕瑣里諸國來貢永樂八年與馮嘉施蘭

復貢後久不至地產金珠瑋瑁燕窩海參烏紅木煙糖

米穀閩人商販者至數萬人嘉靖中是班牙來其地互

市是班牙卽西班牙

同治三年和約稱日
斯巴尼亞或稱日國

隆慶中遣其

臣墨瓦蘭

一作米
牙蘭

駕巨艦東來抵蠻里喇豔其土廣腴

謀襲取乃厚賄遣王乞地如牛皮大建屋以居王不虞

其詐許之乃製牛皮聯屬至數百丈乞如約王業許諾

遂聽之是班牙漸營室築城設守禦萬歷初突以兵船

襲殺其王以其地爲屬藩遣一酋來鎮萬歷四年官軍

追海寇林道乾至其地國人助討有功復朝貢自是與

中國通商貿易歲倍已又慮華人爲變多逐之歸畱者

悉被侵奪二十一年其酋侵美洛居役華人助戰有潘

和五者爲其哨官蠻人待華人虐甚因謀刺殺其酋和五等盡取其金寶甲仗駕舟以歸失路之安南時酋子郎雷貓吝駐朔霧聞之率眾馳至遣僧至閩陳冤乞戮仇人償父命巡撫許孚遠以聞上飭閩浙督撫禮遣之初酋之被戮也其部下居呂宋者盡逐華人於城外孚遠遣人招還然華人嗜利趨死不顧久之復成聚其時曠稅使者四出奸宄蠶起言利有閩應龍張嶷者言小呂宋機易山素產金銀採之可得厚利詣闕奏聞上納之遣海澄丞王時和偕嶷往勘呂宋欲殺嶷賴諸華人共解獲釋歸後呂宋疑天朝將襲取其國諸流寓者爲內應謀盡殺之先後死者二萬五千人移書閩中守

國朝文獻卷一
五
臣言華人將謀亂不得已先之巡撫徐學聚等告變疑
坐誅上並移檄呂宋數以擅殺罪其後華人復稍稍往
而蠻人利中國互易亦不拒崇禎未遣使入貢使臣畱
閩未還先年福建平守臣送其使入都至是遣歸本國
秋八月佛郎機來廣東互市

佛郎機卽法蘭西一作佛蘭西歐羅巴洲大國也東界
日耳曼及瑞士意大理亞南界地中海西班牙西界西
洋大海西北界英吉利北界比利時日耳曼北極出地
四十一度至五十度倫敦經綫偏西四度至東八度舊
三十三部後改八十一部山海四周形勢險固民性謙
和尚禮節而易反覆機變男女喜歌舞佚蕩軍士尙勇

好戰前者傷亡後者繼進士好文學精醫科歷法文字
爲各國誓約所循語言爲歐羅巴之官音狀貌衣服器
用與荷蘭英吉利畧同土產銅鐵鉛錫礬煤水晶玻璃
鐘表羽紗呢絨衣棉蔗糖葡萄其地漢以前皆山林土
蠻好擄掠羅馬征服之

羅馬今意
大里亞

漸知遵化後土酋自

立爲國唐元宗時有臣曰鎚者才勇絕倫回回侵逼血
戰破敵其孫甲利王當德順時平蠻靖難時羅馬內亂
以兵取其地大半後與羅馬教主議復其西都之君號
羅馬教主亦冊爲西朝之君至宋時國人往猶太國
德亞今土
耳其藩屬拜耶穌墓與回回交惡屢相攻戰與英吉利
構兵互相勝負明正德時路義第十二王好戰爲日耳

曼王所擄贖歸國中素崇天主教克力斯頓舊教與波羅
斯特之耶穌教爭戰國王征之不能克乃聽民各隨所
願而崇舊教爲多朝政有五爵分理數百年來嗣王多
驕侈不恤下屢侵凌鄰國府藏虛耗斂怨臣民常致有
篡奪廢置之事其始來廣州也以正德間據東南洋滿

刺加一名麻六甲今英吉利屬地地逐其王十三年遣使臣甲必丹

來貢方物請封詔給值遣還其使久畱不去剽劫行旅
掠買良民倉小兒其使火者亞三復黃緣江彬得侍帝
十五年御史邱道隆言滿刺加乃勅封之國而佛郎機
敢併之且陷我利邀求封貢決不可許宜卻其使臣
明示順逆還滿喇加疆土方許朝貢御史何鼐言佛郎

機最凶狡兵械較諸番獨精前歲駕大舶突入廣東會
城礮聲殷地雷驛者違制交通入都者桀驁爭長今若
仍聽其往來貿易勢必爭鬪殺傷南方之甌殆無紀極
祖宗朝貢有定期防邊有常制故來者不多近因布政
吳廷舉謂缺上供香物不問何方來卽取貨致番舶不
絕於海滙蠻人雜運於州城防禁旣疏水道益熟此佛
郎機所以乘機突至也乞悉驅在澳番舶及番人潛居
者禁私通嚴守備庶一方獲安亞三侍帝驕甚明年武
宗崩下亞三吏自言本華人爲番人所使乃伏法絕其
朝貢其年七月又攜土物求市守臣請抽分如故事詔
復拒之嘉靖二年遂寇新會之西草灣指揮柯榮百戶

王應恩禦之生擒其將別都盧疏世利等四十二人獲其二舟餘三舟賊復接戰應恩陣亡賊亦敗遁官軍得其礮即名為佛郎機副使汪鉉進之朝其小二十觔以下遠可六百步其大七十觔以上遠可五里火礮之有

佛郎機自此始職方外紀昔有佛王名類斯者惡回回據如德亞伐之始制大銃因其國在歐

羅巴洲回回遂概稱西土人為佛郎機而銃亦沿襲此名瀛環志畧火礮之法創於中國明初元駙馬帖木兒

王撒馬兒罕威行西域歐羅巴人有投部下為兵弁者攜火藥礮位以歸諸國講求練習又變通其法為鳥槍

遂為戰陣利器自是諸番貢不以時及勘合差失者悉行禁止

未幾巡撫林富上言粵中公私諸費多資商稅番舶不至則公私皆窘因陳許佛郎機互市有四利部議從之

自是佛郎機得市香山澳又越境商於福建二十六年

巡撫朱紈嚴禁通番番無所利則整眾犯漳州之月港
浯嶼副使柯喬禦卻之後又犯詔安官軍迎擊生擒賊
首李光頭等九十六人紈用便宜斬之怨紈者御史陳
九德劾其擅專給事中杜汝禎往驗言此滿刺加商人
往來販鬻無僭號流劫事不當擅誅紈遂被逮自殺蓋
不知是時之滿刺加卽佛郎機也紈死海禁復弛佛郎
機遂縱橫海上無忌而其市香山澳濠鏡者至築室建
城雄踞海畔若一國

此澳門有洋樓之始然佛郎機旋
去澳不居今所居者乃葡萄牙也

先是暹羅瓜哇占城淳泥諸國互市皆在廣州市舶司
領之正德時移高州電白縣嘉靖十四年指揮黃慶納
賄請於上官移之濠歲輸課二萬金佛郎機遂得混入

久而諸國皆畏避之後僞稱滿刺加入貢已改稱蒲都
麗家部議言必佛郎機也乃卻之番旣築城聚海外雜
番廣通貿易至萬餘人吏莫之詰甚或利其貨寶佯禁
而陰許之番又潛匿倭寇總督張鳴岡檄番人驅倭出
海因上言今倭去而番尙存有謂宜剿除者有謂宜移
之浪白外洋就船貿易者顧兵難輕動濠鏡在香山內
地官軍環海而守彼日食所需咸仰於我一懷異志我
卽制其死命若移外洋則巨海茫茫奸宄安詰制禦安
施似不如申明約束無啟衅無弛防相安無患之爲愈
從之因設雍陌營千人戍之天啟元年監司馮從龍等
毀所築城番亦不敢拒蓋番人本求市易初無不軌謀

而中朝疑之過甚不許其朝貢又無以制之故議者紛
紛然終明之世此番固未嘗爲變也至是廣督佟養甲
疏言佛郎機國人寓居濠鏡澳門與粵商互市於明季
已有歷年後因深入省會遂飭禁止請嗣後仍准番舶
通市自後每歲通市不絕惟禁入省會

臣

按劉淵入而晉室亡祿山寵而唐室亂非我族類
必鋤而去之江統徒戎之論不得謂非先機之哲也
佟養甲援明之舊代佛郎機請許通互市其意原欲
廣 聖朝招徠之仁昭覆載之量而豈知臥榻之側
他人原未可鼾睡哉履霜而凜堅冰雨雪而先集霰
春秋之例所以謹微而慎始者良有以也

壬辰 順治九年

秋七月欽天監監正湯若望進渾天星球地平日晷儀器

西藏羅卜藏嘉穆錯達賴刺麻來朝

西藏卽烏斯藏古吐番今唐古特

一作土伯特

在川滇西徼

外地分三部爲三藏前藏曰康爲察木多亦曰喀木中

藏曰衛爲布達拉

卽吐番建牙之所

達賴刺麻居之後藏曰藏

爲扎什倫布班禪刺麻居之又併極西之阿里爲四部

北界青海河源

古星宿海

南界雅魯藏布江

卽大金沙江上游爲古黑水由

緬甸入

西界雪嶺

卽岡底斯山爲葱嶺南幹

東南界怒江

江外卽西野人境

南界廓爾喀通東印度

卽東天竺今孟加臘英吉利屬地

居萬峯中爲

岷山大小金沙瀾滄怒江諸源所流匯地寒確不宜稻

穀惟產青稞豆麥牛羊仰中國茶布及諸布施距京師
萬四千里自唐太宗以文成公主下嫁吐番贊普通中
國元世祖封番僧八思巴爲帝師大寶法王領其地西
藏遂爲釋教宗主明代廣封法王國師諸號許世襲通
朝貢其地僧多於民舊皆紅教僧帽袈沙其後專習祕

咒流爲邪幻有宗喀巴崛起思改革卽會眾自黃其衣

冠演大乘教有二大弟子曰達賴刺麻曰班禪刺麻皆

能世以呼畢勒罕華言化身轉生自言所往弟子輒迎立之

達賴一世曰敦根珠巴贊普之裔世爲番王亦出家嗣

宗喀巴始以法王兼藏王事二世根敦嘉穆錯自置第

巴代理兵刑賦稅弟子稱胡土克圖則分掌教化始以

活佛聞於中國武宗遣使迎之不至三世鎖南堅錯名
益震紅教之大乘大寶諸法王多改從黃教蒙古諸汗
王皆拱手聽教令時順義王俺答躬入藏迎至青海鎖
南堅錯戒其好殺勸東還俺答亦勸其通中國乃自甘
州遺大學士張居正書自稱釋迦牟尼比邱然皆未嘗
受封中國至五世羅卜藏嘉穆錯當我朝崇德初蒙
古喀爾喀三汗請延達賴明年因厄魯特使遺達賴書
於是達賴班禪及藏巴汗青海固始汗各遣使自塞外
繞道至盛京奉書及方物並獻卦驗知當一統及定鼎
燕京復各遣使貢獻表頌功德詔遣使迎達賴至是
至京上賓之於太和殿建西黃寺居之及行餞之

南苑德壽寺

授金冊印

封西天大善自在佛領天

下釋教普通鄂濟達賴刺麻

命和碩親王碩塞以八

旗兵送之自是塞上諸部安謐多賴其教誠以釋爭而

諸番蒙古之嚮服中國亦時藉其用焉

丙申順治十三年

荷蘭表請修貢

荷蘭

今和約中稱和國

俗稱紅毛歐羅巴濱海之國東界日耳

曼普魯社南界比利時西南界法蘭西西北界西洋大

海北極出地五十度至五十三度英倫經綫偏東二度

至五度地形低窪築堤以禦海潮人戶稠密大似中國

江蘇田少而土膏腴草茂可資畜牧禽獸鱗介充斥自

昔專務通商故國小而富饒工技精巧善造氎呢羅絨
羽紗嗶嘰鐘表古土番部羅馬征服之繼爲日耳曼所
據蕭齊時地歸法蘭西置酋長法有內亂諸酋自立分
十七小部後有不爾疴尼亞復併爲一北宋時海潮決
堤居民皆沒都城幾沒積水匯爲巨浸曰亞爾零海明
成化中爲奧地利亞所有正德時西班牙王兼王其地
荷蘭舊分南北部北卽荷蘭崇耶蘇新教南則彌爾尼
壬卽比利時崇天主教王以峻法抑新教荷蘭人阿蘭治
起兵拒西班牙破之復自立國分爲七部遂晏然富庶
百數十年商舟遠泛與東南洋通貿易於麻六甲蘇門
答臘遍設埔頭噶羅巴島爲大小西洋出入中國門戶

富盛甲兩洋亦據其海口建設城邑流通百貨由是迤

東北之婆羅洲即大瓜哇美洛居巴布亞大小諸島以次據

岸立埔大抵東南洋諸島國惟小呂宋爲西班牙所有

餘皆屬之荷蘭小西洋諸島國今多屬英吉利嗣聞葡萄牙法蘭西市

香山澳豔之萬歷二十九年遂以大艦巨礮薄香山欲

通貢市澳人力爲防禦引去有久居大泥暹羅屬之奸商

誘之通賄稅使高案其酋乃抵澎湖築舍爲久居計會

撫按嚴禁通海始去然是時法蘭西橫行海上荷蘭思

與爭雄復東來破美洛居各島後又奪臺灣據澎湖築

城設守守臣懼禍說以毀城遠徙即許互市天啟三年

乃毀所築城去已而互市不成則復築城澎湖掠漁舟

運土俾華人助築尋犯廈門官軍俘斬數十人乃詭詞
求款仍泊舟風櫃仔出沒浯嶼白坑東椗莆頭古雷洪
嶼沙洲甲洲濱海郡邑爲戒嚴巡撫南居益至上言臣
入境以來番船五艘續至與風櫃仔船合凡十一艘其
勢愈熾有小校陳士瑛先遣往交雷巴

卽噶羅巴

宣諭其王

至三角嶼遇紅毛船言交雷巴王已往阿南國卽荷蘭
因與士瑛偕至大泥謁其王王言交雷巴已大集戰艦
議往澎湖求互市若不見許必至構兵蓋阿南卽紅毛
番國而交雷巴大泥與之合謀必不可以理論非用兵
不可部議從之四年遣將奪鎮海港口城之紅毛退守
風櫃仔益發兵攻擊荷蘭窘求緩兵遂退兵澎湖之警

以息而據臺灣者猶教習土番招誘華人耕作築平安
赤嵌二城以自固崇禎間爲鄭芝龍所破不敢窺內地
者數年乃私貿外洋十年仍駕四舶來廣州求市總督
張鏡心力持不可遁去奸民知事終不成不敢復勾引
而臺灣竟爲鄭成功所奪順治十年因廣東巡撫請於
朝願備外藩修職貢至是齎表請朝貢部議五年一
貢 詔改八年一貢以示柔遠

丁酉 順治十四年

夏四月欽天監秋官正吳明烜劾監正湯若望不實議罪
赦免

回回科秋官正吳明烜疏言湯若望所推七政書水星

二八月皆伏不見今水星於二月廿九日仍見東方八
月二十四日又夕見又言若望舛謬三事一刪除紫炁
一顛倒觜參一顛倒羅計 命內大臣等公同測驗水
星實不見議明烜詐妄之罪援赦得免

己亥 順治十六年

安南入貢

安南今越南國北界廣東廣西雲南西界暹羅東南際
大海北極出地自八度至二十三度中綫偏西自八度

至十三度都於富良江南岸

富良江今亦曰紅河源於雲南曰河底江即梨花江

又曰地產五金絲茶漆靛木棉肉桂象牙胡椒諸香料

衣冠仍唐宋之制職官選舉文字大都遵倣中國坐則

席地貴人迺施短榻尙循古制國中禁令甚嚴紅毛人以鴉片誘據交畱巴復誘安南安南覺其陰謀犯者立置重典又嚴禁天主教有人教者殲滅之不與西洋通

市

乾隆中阮光平以廣南篡據安南引法蘭西人爲助與之通市後遂據其西貢

地本古南交

秦以交阯隸象郡漢置交阯郡後改交州唐置安南都護府五代時曲承美竊據始自立國爲外藩宋初封丁璉爲安南郡王三傳而爲其臣黎桓所篡黎亦三傳而爲臣李公蘊所篡李八傳無子傳其臣陳日烜陳歷十二傳而爲其臣黎季犛所篡前明張輔沐晟等蕩平其地置安南布政使後簡定季犛相繼復叛嘉靖元年莫氏篡黎上用張經言封黎氏爲安南都統使莫氏爲安

平令 其南界之林邑古越裳氏地西漢置九真日南郡漢末自立爲國後稱占城宋時併於真臘稱占臘明代爲安南所併稱廣南以交阯爲東都廣南爲西都鎮以重臣爲藩封後廣南日強乾隆嘉慶中新舊阮氏皆以藩封得國 是年大兵征雲南莫敬耀首納款至軍貢方物

詔封爲安南都統使

夏六月明鄭成功陷鎮江進薄江寧總兵梁化鳳大敗之
成功遁還海島

初明嘉靖中海賊林道乾竄據臺灣爲琉球人所逐倭人又逐琉球而據其地天啟時泉州人鄭芝龍往附之因家臺灣倭旋爲荷蘭所逐芝龍與其黨入海爲寇崇禎中巡撫沈猶龍招降之敗荷蘭寇閩之師積功官至都督同知福王立封安南伯南都破唐王稱號隆武芝

龍及禮部尙書黃道周等奉之順治三年唐王被執死
芝龍降於我朝而芝龍娶倭婦所生子成功及兄子
彩聯等并擁眾海上猶奉隆武年號而成功最强連陷
濱海諸府州縣已而彩聯之金門廈門亦於七年盡爲
成功所奪遣使朝桂王永歷於湖南封延平郡公屢陷
海濱諸縣圍漳州十年朝廷下令招撫令芝龍以書
招之彩聯等皆降獨成功不從十四年永歷遣使進成
功延平郡王招討大將軍至是聞王師三路攻永歷
於雲南乃大舉會浙江張煌言之師內犯江南圖牽制
是月以海艘乘風潮上焚沿江木柵斷橫江鐵索破瓜
洲遂陷鎮江進逼江寧謁孝陵移檄遠近東南大震時

上幸南苑議親征兩江總督郎廷佐佯通款以緩
攻崇明總兵梁化鳳赴援化鳳望敵營不整因大出師
以三路攻其前以勁騎繞出山後夾攻敵遂大潰又燒
其海艘五百餘成功遂以餘艦遁還

辛丑
順治十八年

鄭成功攻臺灣逐荷蘭而取其地 詔徙沿海居民嚴海

禁

鄭成功自江南敗歸崎嶇海上日久屢進取無功謀奪
臺灣爲窟穴會荷蘭通事何斌逋負巨債投成功請爲
嚮導至是進泊澎湖紅毛以大舟沈塞港口礮發潮漲
丈餘數百艘倏抵岸遂克赤嵌城進圍王城半載不下

乃絕水源以困之荷蘭棄臺灣以大舶遷去鄭氏遂有
臺灣與金廈兩島相犄角 詔沿海居民三十里界外
盡徙內地禁漁舟商舟出海以杜句通總督李率泰遂
遷同安之排頭海澄之方田邊境八十八堡安置內地

國朝柔遠記卷一

國朝柔遠記卷二

臣 彭玉麟恭定

臣 王之春敬編

癸卯 康熙二年

夏六月荷蘭入貢

荷蘭自順治十三年請貢經禮部議准後是年始由廣東入貢方劍八皆可屈伸馬四鳳膺鶴脰迅速異常
詔嘉賚之

冊封琉球國王

琉球東洋小國也有三十六島紆蟠如虬龍流動故稱流虬後改琉球南北四百里東西不足百里在日本薩

司馬南值臺灣東北都於那壩其島較大海風甚烈地
磽瘠少米民食番薯唐宋以來始通中國明初入貢太
祖賜以閩人善操舟者三十六姓後日本虜其王不屈
復送還國修貢如常舊有山北山南中山三部後中山
王并之以國小而貧爲日本所屬役惟世奉中國正朔
先是國王尙質於明季請封未果使者畱閩順治中轉
送禮部繳前敕印循舊典差行人張學禮副使王垓

賜一品服往冊封尋以海氛未靖暫停至是仍差學禮
等往竣事 賜王及妃蟒緞綾綢各四十八匹使還隨
貢槍刀扇紙琉黃蕉布胡椒等物自是定貢舟三年一
至許販鬻中土貨物免其稅國中資以爲利焉

甲辰康熙三年

克廈門金門展沿海居民地界

鄭成功既破荷蘭而有臺灣

朝廷遂誅芝龍及鄭氏

在京者元年成功卒長子錦

經一作

守廈門入臺嗣立靖

南王耿繼茂總督李率泰貽書招錦錦請如琉球朝鮮
例不報時明桂王已滅而錦猶奉永歷年號至是繼茂
率泰及降將施琅黃梧等進兵克廈門金門浯嶼降其
眾萬八千錦遁歸臺灣始展沿海居民界復舊業

十二月戊午朔日倉不應黜湯若望

初徽州歙縣人楊光先告欽天監正湯若望傳天主教
且其造時憲書有十謬一不用諸科校正之謬二一月

有三節氣之謬三二至二分長短之謬四夏至太陽行
遲之謬五移寅宮箕三度入丑宮之謬六刪除紫炁之
謬七顛倒觜參之謬八顛倒羅計之謬九黃道算節氣
之謬十歷止二百年之謬禮科議駁不准至是又摘本
年是月日會交會之誤狀告禮部曰湯若望陽假修歷
之名陰行邪教之實散布邪黨於濟南淮安揚州鎮江
江寧蘇州常熟上海杭州金華蘭谿福州建寧延平汀
州南昌贛州廣州桂林重慶保寧武昌西安太原絳州
開封並京師共三十堂每堂一年五十餘會每會收徒
二三十人各給金牌繡袋妖書會單以爲憑驗請照
大清律左道妖言二條治罪 旨下禮部會吏部同審

湯若望等及傳教之歷官李祖白擬大辟免死其作序之給事中許之漸罷黜

乙巳康熙四年

以楊光先爲欽天監正

是年特授楊光先欽天監右監副旋授監正光先以但知推步之理不知推步之數且以攻罷異端爲邪黨所忌潛伏殺機恐遭陷害力辭新職疏凡五上卒不准辭

丙午康熙五年

封安南國王黎維禧

時黎維禧繳呈明桂王永歷所給敕印

詔遣使封爲

安南國王自後貢獻定六年兩貢並進貢道由廣西太

平府入關不由海道

戊申康熙七年

秋七月欽天監監副吳明烜罷以治歷南懷仁爲監副

懷仁大西洋人於

上初元來華在監治歷劾奏吳

明烜所造八年己酉歲時憲書七政民歷內閏十二月
應是九年正月又一年兩春分兩秋分種種謬誤刑部
議明烜罪奉 旨從寬杖四十革職以懷仁爲監副

己酉康熙八年

秋八月議欽天監正楊光先罪

光先在監數年吳明烜爲監副因本年置閏之誤明烜
已爲南懷仁所劾光先自覺其非自行檢舉但時憲書

已 頒行乃下

詔停止閏月下光先於獄刑部議光

先罪當斬

上憐其年老加

恩從寬免死至是改

戍後遇赦歸行至山東暴卒

光先赦歸至山東暴卒時有謂其為湯若望之黨毒

死者但東華錄祇云年老卒其遇毒死之說諸書皆無

加恩免死疇人傳祇云歸確

先是湯若望雖罷黜而羽黨實多天主教傳布中國

光先自憤其先憂之隱不白於天下後世嘗著不得已

書闢其教法深為若望之黨所嫉其不得已上篇云歷

官李祖白天主教之門人也著天學傳概一卷其言曰

天主教上帝開闢乾坤而生初人男女各一子孫居如德

亞國此外並無人居當是時事一主奉一教紛歧邪說

無自而生其後生齒日繁散走遐邇遂為大東大西有

人之始卽爲中國有人之始夷考其時當在伏羲氏是中國之初人實如德亞之苗裔天學固其所懷來也延至唐虞三代君臣告誡於朝聖賢垂訓於後往往呼天稱帝以相警勵其在書曰昭受上帝天其申命用休詩曰文王在上於昭于天魯論曰獲罪於天中庸曰郊社之禮所以事上帝孟子曰樂天畏天事天何莫非天學之法語微言是中國之教無先天學者噫小人而無忌憚亦至此哉不思今日之天下卽三皇五帝之天下也祖白謂歷代之聖君賢臣是邪教之苗裔六經四書是邪教之微言將何以分別 本朝之君臣不爲邪教之苗裔乎而弁其端者曰康熙三年柱下史毘陵許之漸

敬題噫異哉史臣諫官而亦爲此言耶雖前明之季學士大夫如徐光啟李之藻李天經馮應京樊良樞等多爲天主教作序然或序其歷法序其儀器序其算數至進天主書像未有序之者實湯若望自序之可見徐李諸人猶不敢公然得罪名教也若望之爲書也曰男女各一以爲人類之初祖未敢直言覆載之內胥其教之子孫祖白之爲書也則盡中國而如德亞之矣盡中國之古先聖師而邪教苗裔之矣盡歷代之聖經賢傳而邪教緒餘之矣豈止妄而已哉天主教不供君親是率天下而無君父者而之漸之序曰二氏終其身於君臣父子而莫識其所爲卽儒者亦不能無弊噫是何言也

二氏寺觀奉龍牌尙識君臣佛經言供養千辟支佛不如孝堂上雙親尙知父子況吾儒以天秩天序天倫天性立教乎惟天主耶穌以犯法釘死是莫識君臣耶穌之母瑪利亞有夫名若瑟而曰耶穌不由父生是莫知父子何顛倒之甚也楊墨之害道也不過爲我兼愛而孟子卽拒之曰楊墨之道不息孔子之道不著傳概之害道也苗裔我君臣學徒我周孔祖白之意若曰孔子之道不息天主之教不著孟子之拒恐人至於無父無君祖白之著恐人至於有父有君而許君爲祖白作序是拒孔孟而尊祖白矣邪教開堂於京師宣武門之內東華門之東阜城門之西山東之濟南江南之淮安揚

州鎮江江寧蘇州常熟上海浙之杭州金華蘭谿閩之
福州建寧延平汀州江右之南昌建昌贛州東粵之廣
州西粵之桂林蜀之重慶保寧楚之武昌秦之西安晉
之太原絳州豫之開封凡三十窟穴而東粵之香山澳
萬人盤踞其間成一大都會暗地往來若望藉歷法以
藏身金門而碁布邪教之黨羽於十三省要害之地其
意欲何爲乎明綱之所以不紐者由廢祖宗之法弛通
海泄漏之律徐光啟以歷法薦利瑪竇等於朝以數萬
里不朝貢之人來而弗譏其所從來去而弗究其所從
去行不監守之止不關防之十三直省之山川形勢兵
馬錢糧靡不收歸圖籍而弗之禁古今有此玩待外國

人之政否我 朝因明之待西洋如此習以爲常不察
伏戎於莽萬一竊發百餘年後將有知予言之不得已
者其下篇云天主教所事之像名曰耶穌手執一圓像
問何物則曰天問天何以持於耶穌之手則曰天不能
自成其爲天猶萬有之不能自成其爲萬有必有造之
者而後成天主爲萬有之初有其有無元而爲萬有元
超形與聲不落見聞乃從實無造成實有不需器具先
造無量數天神無形之體次及造人其造人也必先造
天地品彙以爲覆載安養之需故先造天造地造飛走
鱗介種植等物然後造人男女各一男名亞當女名厄
襪以爲人類之初祖天爲有始天主爲無始有始生於

無始故稱天主焉次造天堂以福事天主者之靈魂造
地獄以苦不事天主者之靈魂人有罪應入地獄者哀
悔於耶穌之前並祈耶穌之母以轉達於天主卽赦其
人之罪靈魂亦得升於天堂惟諸佛爲魔鬼在地獄中
永不得出問耶穌爲誰曰卽天主問天主宰天地萬物
者也何爲下生人世曰天主憫亞當造罪禍延世世苗
裔許躬自降生救贖於五千年中或遣天神下告或託
前知之口代傳降生在世事跡預題其端載之國史降
生期至天神報童女瑪利亞胎孕天主瑪利亞怡然允
從遂生子名曰耶穌故瑪利亞爲天主之母童身猶未
壞也問耶穌生於何代何年曰漢哀帝仁壽庚申二年

噫荒唐怪誕亦至此哉夫天二氣之所凝非可造而成者也設天果有天主則覆載之內四海萬國皆天主所宰制必無獨主如德亞一國之理且既稱天主凡天下事皆天主主持當其下生三十三年誰代主宰其事天既無主則天不運行地不長養人不死生物不蕃茂乾坤或幾乎息矣天主欲救亞當胡不下生於造天之始乃生於漢之仁壽庚申天主造人當造盛德至善之人以爲人類之初祖猶恐後人之不善繼述何造一驕傲爲惡之亞當致子孫世世受禍且其子孫中又有聖有賢有智有仁不盡亞當之所爲又何人造之哉天主下生救之宜過化存神型仁講讓登一世於熙皞其或庶

幾乃不識其大而好行小惠惟以瘳人之疾生人之死
爲事又安能救一世之雲初去惡而遷善以還造化之
固有哉釋氏銷罪崇善去惡彼教但以奉耶穌母子者
卽升之天堂不奉者卽下之地獄使奉者皆善人不奉
者皆惡人猶可說也苟奉者皆惡人不奉者皆善人不
已顛倒賞罰乎謂佛墮地獄中永不得出誰則見之而
耶穌生釘十字架現身劍樹苦海豈有主宰天地萬物
之人而不能自主一身之性命乎豈有造化世界之上
帝而世人能戕之戮之乎剽竊釋氏天堂地獄之唾餘
而反唇相謗則雖道教方士之剽佛謗佛不如是甚也
且又援儒而謗儒歷引六經之上帝斷章以證其爲天

主而曰蒼蒼之天乃上帝所役使或東或西無頭無腹
無手無足未可爲尊況地爲眾足所踐污穢所歸安有
可尊之勢夫不尊天地而尊上帝猶可言也尊耶穌爲
上帝不可言也耶穌而誠全天德之聖人也則必一言
而爲法後世一事而澤被生民若伏羲文王之明易象
堯舜之致時雍大禹之平水土周公之制禮樂孔子之
明道德斯萬世之功也耶穌有一於是乎如以瘳人之
病起人之死爲功此華佗良醫祝由幻術之事非大聖
人之事也更非主宰天地萬物者之事也苟以此爲功
則何如不令人病不令人死之功爲更大也以上帝之
聖神廣運一一待其遇病瘳之遇死起之則已不勝其

勞況遇耶穌者一二不遇耶穌者無窮其救世之功安在也且利瑪竇之書止載耶穌救世功畢復升歸天而諱其死於王法至湯若望黠不若利瑪竇乃並其受罪釘死直圖而布之其去黃巾五斗米之張道陵幾何世或以其制器之精奇而喜之或因其不婚不宦而重之不知其儀器精者兵械亦精適足爲我隱患也不婚宦者志不在小乃在誘吾民而去之如圖日本取呂宋之已事可鑒也詩曰如彼雨雪先集維霰傳又曰鷹化爲鳩君子猶惡其眼今者海氛未靖譏察當嚴揖盜開門後患宜愍盜使今日詈予爲妒口毋使異日神子爲前知斯則中國之厚幸也夫

國朝文獻通考卷之二
九

臣按戰國時楊朱墨翟之言盈天下孟子不得已以能言拒之甘負好辯之名而堯舜禹湯文武周公孔子之道賴以不喪於天下後千餘年佛老之說陷溺人心韓子不得已作原道以明先王之教而堯舜禹湯文武周公孔子之道亦得未墜於地我朝定鼎之初湯若望挾其新法混入中國一時喜其歷法準驗稍弛中外之大防遂致腥羶雜處光先不得已而爲是篇言耶穌自稱爲上帝雖與福音書稍歧然閑先聖闢異端義正詞嚴亦大有功於名教而當時言天學者右湯而左楊抑何不思之甚耶

冬十二月禁直省立天主堂

先是欽天監官依舊法推算康熙八年十二月當置閏南懷仁言雨水爲正月中氣是月二十九日值雨水卽爲九年之正月不當閏置閏當在明年二月監官多直懷仁言乃改閏二月遂特旨許西洋人在京師者自行其教凡在各省開堂設教者禁之

庚戌康熙九年

金川土司嘉勒巴內附

金川在四川松潘廳徼外有二源一出小阿樹土司經黨壩入境爲大金川一源較近爲小金川皆以山產金礦得名二水合流後爲大渡河西南會打箭鑪河而南又東至嘉定會青衣水入岷江漢冉駝外徼隋置金川

縣唐維州地明隸雜谷安撫司其地萬山叢蠹溪流洶湧深寒多雨雪惟產青稞蕎麥番居皆石礪至是其土司嘉勒巴來附 上以其俗崇西藏釋教給演化禪師印俾領其眾

復起湯若望欽天監正

自是時憲書用西歷新法永為定制

若望後以十七年卒

夏六月意大里亞入貢

意大里亞一名以他里即後漢書大秦國

以其人長大類中國故中

國人以此稱之非其本名

又名犁韃在歐羅巴洲南境東北界土耳其

其亞得利亞海西南并界地中海西北界法蘭西大山北界瑞士東北界奧地利亞北極出地自三十八度至

四十六度英國中綫偏東自四度至十六度本昔之羅

馬國卽天主教宗國歐羅巴列邦建置本末以額力西

爲最著

額力西一名厄勒祭在意大里亞東希臘其都城一區之地昔并於土耳其今希臘仍自爲一

國當周時尙強盛爲希臘諸國漢始爲意大里亞所并

卽羅馬也國創於周至漢而成泰西混一之勢東西分

裂在東晉侵削在六朝及唐宋宗社之墟在明景泰祚

歷二千餘年而後法蘭西英吉利代興利瑪竇始以萬

國全圖幾何歷法天主耶穌經像汎海九萬餘里而入

中國故惟意大里亞足以綱紀大西洋開古今中外一

大變局其羅馬語言文字法制技巧諸西國猶宗之今

疆土已裂爲十三國國王雖偏處東方而西部羅馬舊

都之天主教化王猶為諸西國總持萬國全圖之說曰

天下有五大洲一曰亞細亞凡百餘國而中國居其一

二曰歐羅巴凡七十餘國而意大利居其一三曰利

未亞一作阿非利加亦百餘國四曰亞墨利加即米利堅洲地當全

球之半分為南北二洲最後得墨瓦蠟泥加洲即澳大利亞一

稱阿塞尼亞而五域中大地盡矣為天主教之說者曰天主

名耶穌即救世主也一稱基督於漢哀帝仁壽二年西人

言天主教生年亦不一有以為在殷周者有以為在虞夏者然以今西洋諸國紀年按之則此為合產於

亞細亞西境之如德亞國即猶太也今南土耳其藩屬天主為

上帝之子代天行化以聖教導民嘗贖人之罪代受酷

刑釘於十字架而死死而復活昇天其教傳播西土有

彼得羅者產於羅馬爲天主十二門徒之首繼闡教化
又有伯多祿寶珠二人至羅馬講明天主事理人多信
之而後總王公斯瑞丁立殿以崇奉之卽今意大里亞
教化王所居是教化王者所以代天主在世布教之君
也其說大畧如此今夷考教王厥初爲教師當劉宋時
羅烏西都爲北狄峩特族所據教師乘機傳會福音之
說引誘諸蠻而鈴束之遂操國權而加特力教興焉天主
教分爲三總名克力斯頓教加特力乃天主舊教之名
一稱洋教又有額力教波羅士頓教爲諸國後起新教
一名西教常以爭教之故結黨相攻代中值法蘭西滅峩特以地歸教師
號教化王以教人尊信天主故又稱教主總教主死則
各國分領之教主會推一老成者以嗣其位諸有大事

則請命焉奉爲聖父神師各國有不遵教者則滅其國
或廢其君故各國王雖非其臣莫不致敬盡禮後雖其
權稍替然如法蘭西之創霸英吉利北族之起兵皆先
請命天主以至遠方來焚香者歲以萬計又拜天主母
瑪利亞像籲禱尤虔故民多惰農自安林多伏莽捕亟
則以天主堂爲逋逃藪此意大里亞教王大致也願國
人習技能善推步往往挾度數之學以藏身飾天主之
說以惑眾利瑪竇以萬歷九年來廣州歷久始至京師
中官馬堂以其方物進獻稱大西洋入禮部奏言會典
止有西洋瑣里無大西洋眞僞不可知又寄居二十年
方進貢則與慕義特來獻琛者不同且所貢天主及天

主母圖既屬不經而所攜又有神仙骨夫神仙飛昇安得有骨則唐韓愈所謂凶穢之餘不宜入宮禁者況此等方物未經臣部譯驗徑行進獻則內臣混進之罪有不容辭者及奉旨送部乃不赴部審譯而私寓僧舍臣等不知其何意不報帝竟嘉其遠來給賜優厚公卿以下咸與晉接利瑪竇安之畱居不去其徒來益眾有王豐肅

職方外紀以爲卽西班牙王名亞豐肅世傳歲差本原皆其攷定製爲一定圖像

陽瑪諾

者居南京專以天主教惑人又盛誇其風土人物遠勝中華禮部郎中徐如珂惡之乃召兩人授以筆劄令各書所記憶悉舛謬不合乃與侍郎沈淮給事中晏文輝等合疏斥其邪說惑眾且疑爲佛郎機所假託乞亟行

遣逐給事中余懋孳亦以爲言帝納之令豐肅及龐迪我等俱遣赴廣東聽還本國時迪我等以明歷法在天監同測驗奏乞寬假不報乃怏怏去豐肅尋變姓名復入南京行教如故他如龍華民畢方濟艾如畧熊三拔皆意大里亞人而湯若望羅雅谷等既其纂成崇禎歷書若望遂入本朝官監正至是國王遣使奉表貢

金剛石飾金劍金珀書箱珊瑚樹琥珀珠伽南香哆囉絨象牙犀角乳香蘇合香丁香金銀花露花幔花璫大

玻璃鏡等物大西洋去中國水程八萬里其道由地中

海西出大洋南行過福島

島在利未亞洲之西西人言地輿者昔以此島爲中綫以

分東西

東南行泛利未亞海過大浪山折而東過西南

緯度

海東北行過小西洋又東行至小呂宋入廣東境此時大往

西洋來華海道迂折所經故稱八九萬里後益熟悉道里漸趨直徑至同治間各國商人在土耳其之東埃及

國蘇益微地開蘇彝士新河百七十里由西紅海達地中海以通輪舟較當日海道省二萬里

冬十二月暹羅遣使請貢

暹羅國在東南洋東界越南南界海西南界滿刺加西

界緬甸西北隅界南掌即老北界雲南北極出地八度

至二十一度中綫偏西自十四度至十八度國都曰曼

谷環境皆山東南海口即舊水真臘國有二大水一瀾

滄江發源青海經雲南入境至東埔寨入海一湄南河

發源雲南之李仙把邊等河由北境會諸水而南入海

國西南有斜仔一作六坤宋据勝一作宋卡大年一作丁葛

奴彭亨諸番部皆其屬國地饒沃產米尤多百物豐盛
爲海舶市埠之最有利銀錫金剛寶石犀象翡翠鸚鵡火
雞沈速伽南降眞諸香烏木蘇木棕竹貓竹胡椒豆蔻
阿魏冰片諸藥料材木作船甚堅美民多習逸俗崇佛
教寺像華侈文字皆旁行後乃稍習中國字向惟知尊
重中國閩廣人在其地者甚眾官屬亦多以中國人爲
之風俗勁悍習水陸戰堅木棚爲營與緬甸同其國卽
古越裳地晉宋爲扶南王隋唐爲赤土國及婆羅剌地
後分暹與羅斛二國元時暹嘗入貢始知其名羅斛後
并有暹境明洪武中貢馴象給賜印文始稱暹羅國與
老撾南掌占臘干賓文萊鄰後并爲所屬萬歷二十一年

倭據朝鮮暹羅請潛師直擣日本兵部石星主之廣督
蕭彥持不可乃已其西屬國舊有滿刺加柔佛正德中
爲法蘭西所破而葡萄牙荷蘭疊據之立市埠今英吉
利於舊
柔佛立市埠
卽新嘉坡然暹羅迄崇禎十六年猶入貢其效順中
國如此至是遣使請貢換給印敕勘合許之

癸丑康熙十二年

暹羅遣使朝貢

暹羅旣得請使還其國王森烈拍臘照古龍拍臘馬嘑
陸坤司由提呀菩琰遂遣使臣握坤司吝喇那低邁禮
偕貳貢三貢使臣等具金葉表文貢馴象孔雀鮫布諸
香有 旨褒嘉頒賜敕印自後職貢時通其入貢由海

道抵粵東

春三月吐魯番入貢

吐魯番在天山南路時回疆各城尙有元裔汗王吐魯番蘇勒檀汗至是遣使入貢疏言臣國蹇遭變亂不能進獻今地方稍平特遣兀魯和祭於一千八十三年二月十八日遠貢方物其紀年蓋用回教故也

回教以摩哈默德離

本國之年爲元起唐高祖武德四年

甲寅 康熙十三年

鄭錦陷漳州泉州汀州邵武興化及惠州潮州諸府縣

鄭錦自失廈門衰弱不敢內犯十二年冬平西王吳三桂反雲南靖南王耿精忠亦叛告援鄭氏許給以漳泉

二府錦遂渡海而西與合從進陷漳泉諸府精忠旋背
約

秋八月 命治歷南懷仁鑄火礮

西洋火器輕利時三藩背叛鄭錦復猖獗海上因 命
南懷仁鑄西洋火礮三百二十尊助大軍進勦

丙辰康熙十五年

收復漳泉諸府

耿精忠與 王師抗屢敗挫鄭錦又侵奪其地前後受
敵乃於是年反正導康親王傑書之師攻鄭錦遂復漳
州泉州諸府

俄羅斯人來 貽書其國察罕汗

俄羅斯一作鄂羅斯地跨亞細亞歐羅巴兩大洲北境

又兼得亞墨利加洲葛西模斯之一隅在歐羅巴者有

東西南大小加匱南新藩俄羅斯七大部東俄羅斯即比特革部新

都彼德羅堡所在大俄羅斯則舊都莫斯科所在在亞細亞者為東西悉畢爾

即西伯利部一作西里阿東西悉畢爾各分一區是為新東

藩之四大部四部一都莫斯一科利弗合歐洲七部共

十一大部聖武記以計由之舊都莫斯科之新都西哈薩克之喀山合悉畢爾為四大斯科又以奪

阿藻東北之地曰司馬廉曰郭羅多曰佛羅尼三斯科及索遷舊疆之那爾瓦合為八大斯科又按海國圖志

俄羅斯全圖則於西七大部東四大斯科外又有依烏拉嶺東南哈薩克西北之三大斯科部落分合難以強

同豈前後有變更抑載記有紛錯耶姑存此以備考大部稱為大斯科猶華言省

治也所屬有小斯科及柏興則若府治縣治然疆域東

接彌利堅洲

即亞墨利加洲

之墨領海峽

墨領一作北合或作伯淋

其古利

羣島則界日本東南界黑龍江蒙古新疆哈薩克與中

國相首尾南界黑海裏海波斯土耳其西界洲中海

一名

波羅的海

奧地利亞普魯社瑞典北至冰海北極出地自三

十八度至七十八度福島經綫自二十二度至一百六

十八度東西二萬餘里幾得地球面八之一國中央多

坦平惟東藩地負阿爾泰山大興安嶺之陰東西二洲

間則烏拉嶺自裏海以屬北海為葱嶺北幹中以一徑

為二大洲之關鍵大抵種植材用皆產西南境東多砂

磧瀉鹵北皆冰雪不毛而產五金珍寶及狐鼠貂獺海

馬鱗介之屬人民罕居夏則有晝無夜冬則有夜無晝

國人碧目深睛鬚髮黃赤黑睛者相傳漢李陵遺種各部種族甚繁有天主教回教釋教各以地之相近唯所奉性勇悍樂戰鬪騎兵尤趨捷奴僕之數極多五爵至以多寡爲產業之大小稅則猶循什一之遺兵則給農田使養兵無事則兵亦助耕國人向多獷野近設學館購書籍雅尙文藝朝以大臣分理國政然事少定例權皆其主自操之故事多任臆常生叛亂自昔不通中國漢則渾窳屈射堅昆丁零諸國爲匈奴所屬唐爲黠戛斯骨利幹宋初有女王以國地分給其十二子至元初爲阿速欽察阿羅思吉利吉思昂可新諸國日尋干戈而太祖滅之以封長子朮赤

地皆在蔥嶺北未至東方

阿羅思族裔

逃於北海之計由而臣於元俄羅斯卽阿羅思轉音也

元亡族姓爭俄族亦內亂明宏治中有部長部長名伊

或稱宜萬王或稱以文第一王乞援於西費雅國卽瑞典假其兵以靖亂

又起兵盡驅蒙古恢復舊疆自立為汗又并東方之西

比厘阿卽東悉畢爾始抗衡歐羅巴洲傳至萬歷季年國亂

有彼得羅王一作比達王發憤修政潛遊荷蘭諸國船廠火

器局講習工技歸國選授才俊建設藝館遂破瑞典而

建新都卽號彼得羅堡新都在東俄部一名比特革其

後復還舊都至道光中為佛郎機所燬今仍都彼得羅堡攻取南方以資游牧通海

路以廣貿易遷招俊傑以任將帥國勢日強疆土益闢其

與我朝通商也當龍興之初其東部曰羅刹者地

備考以爲此係南俄部端戈薩司由東洋海岸收毳鑛
之兵善騎善戰領兵者爲爾特厘

之貢沿菴雅臘河至麥加湖即呼倫貝爾泊徑抵黑龍江北岸

據雅克薩尼布楚二地樹木城居之侵擾諸部時我

大兵亦方定黑龍江索倫達瑚爾及使犬使鹿各部兩

師相值各罷兵嗣又越興安嶺南向侵掠布拉特烏梁

海四佐領崇德四年我大兵再定黑龍江毀其城兵

退而羅刹復城之順治十一年遣兵逐之十五年調高

麗兵逐之又數遣大臣督兵以餉不繼而返而十二年

及十七年俄羅斯察罕汗兩附貿易人至京奏書亦絕

不及邊界事至是其商人尼果賚等至上召見之

貽察罕汗書令管束羅刹毋擾邊陲

丁巳康熙十六年

收復惠潮諸府

上年康親王之師收復漳州泉州後至是惠州潮州亦

反正鄭錦遁入廈門

戊午康熙十七年

鄭錦復侵沿海城堡

錦在廈門復集眾侵沿海城堡 詔復遷濱海居民申

舊禁

秋八月遣意大里亞使臣歸國

意大里亞以九年入貢至是 召見於 太和殿賜宴

遣歸 上以其遠泛重洋傾誠慕義 錫賚之典視

他國更優

己未康熙十八年

總督姚啟聖提督楊捷解漳州泉州圍進克海壇金門廈門

鄭錦將劉國軒等復陷海澄官軍死者三萬餘都統赫穆林提督段應舉皆遇害 詔罷總督郎廷相以姚啟聖代之與提督楊捷夾攻解漳泉圍國軒遁還海澄扼守諸島相持久不決乃厚積舟師并檄荷蘭夾板船助剿未至官軍已克復海壇海澄進逼廈門國軒遂棄金廈二島遁歸臺灣

庚申康熙十九年

貝子賴塔貽書招鄭錦

先是總督李率泰貽書招錦至是貝子賴塔復貽書招之錦請如約惟欲畱海澄爲互市地姚啟聖不可

辛酉康熙二十年

復展沿海居民地界

時沿海府州縣及金廈二島均已收復總督姚啟聖巡撫吳興祚疏請沿海民展界復業從之

壬戌康熙二十一年

築黑爾根及齊齊哈爾城

築城備俄羅斯侵軼也自十九年附尼果賚等 貽書

察罕汗久未有答書而羅刹仍潛侵淨里溪等處遷延

不去復東掠人畜於赫哲費雅哈飛牙喀奇勒爾諸地
藪我逋逃阻我索倫貂貢將割據黑龍江東北數千里
甌脫地 上以其密邇留都不可滋蔓又重開邊釁
因遣都統彭春等以兵獵黑龍江徑薄其郭偵形勢於
黑爾根及齊齊哈爾各築城戍之置十驛通水運又令
喀爾喀車臣汗斷其貿易以困之

癸亥 康熙二十二年

夏六月水師提督施琅征臺灣平之鄭克塽降

先是鄭錦頻年出兵在外用陳永華言命子克塽監國
長而才然婢出也二十年錦卒成功妻董氏入間言殺
克塽而立次子克塽襲延平王幼弱不任事事皆決於

侍衛馮錫範人心益失於是總督姚啟聖奏鄭錦死子
少國內亂時不可失時壞將劉國軒貽書啟聖請如琉
球諸國例稱臣入貢啟聖以聞 上不可 命進兵

將出師啟聖欲候北風直取臺灣施琅欲乘南風先取
澎湖奏言澎湖不破臺灣無取理澎湖失則臺灣不攻
自潰請以戰艦三百水師二萬獨任討賊而留督臣廈
門濟餉 詔從琅策時劉國軒擁眾守澎湖甚嚴我軍
次七罩灣適潮漲舟乘以進會颶風夜發怒濤山立國
軒壘壁環二十里四面列巨礮琅親督大艦衝圍矢集
琅目不少卻國軒自率二萬人泊牛心灣別屯萬人於
雞籠嶼相犄角琅乃分兵三路以五十艘出雞籠爲奇

兵分敵勢自督五十六艘分八隊攻其中堅又以八十艘繼後每路中復各分三隊不列大陣約以五艘攻其一艘人自爲戰酣鏖竟日聲震數百里焚百餘艘殺萬有二千人凡海洋占候雲合風生雷鳴風止是日將戰黑雲起敵方相賀忽聞霹靂皆驚愕失色遂大敗國軒由吼門冒險突圍而逸我軍乘勝至鹿耳門膠淺不得入泊海中十二日潮不至忽大霧潮高丈餘舟師平行而入鄭氏驚曰先王得臺灣鹿耳門漲今復然天也於是遣僞官鄭平英等齎表至施琅軍前降琅請頒赦招撫

上諭鄭克塽曰帝王撫御寰區仁覆無外卽海隅日出之邦無不欲其咸登衽席共樂昇平爾祖父

自明季以來出沒海洋盤踞島嶼本朝定閩後爾祖鄭
成功竊據海隅甘外王化以及爾父鄭錦句引奸徒窺
伺內地屢經剿撫頑梗怙終爾方童穉妄思效爾前人
倚險負固飄突靡常故特選將練兵出洋進剿爾等果
能悔罪投誠率所部僞官軍民人等悉行登岸將前罪
盡行赦免仍加恩安插務令得所爾等其審圖順逆善
計保全以副朕宥罪施仁至意克塽遂率劉國軒馮錫
範等俱薙髮降臺灣平臺灣在閩海中縱干有餘里衡
四五百里地脈自福州鼓山越大洋爲澎湖諸島又東
二百里爲臺灣起雞籠山南盡沙馬碕東南渡洋爲小
呂宋東卽大東洋東北直琉球日本北則朝鮮盛京西

北爲青徐江浙海疆西與福泉興漳相值西南走交廣
檣帆相接濱海土地饒沃一歲三熟山前多泉漳惠潮
民徙墾山後皆土番所居曰社有三百餘社分生熟二
種生番居深林密箐言語不通熟番亦與居民雜處通
市而皆射生飲血嗜殺械鬪土產布穀五金煤礦毛羽
皮革竹木絲漆蔗糖甚豐其地古不與中國通罕有至
者卽宋史所謂澎湖東有毘舍那國是也明嘉靖後海
賊林道乾竄踞後爲鄭成功所有至是施琅言臺灣一
島之地實腹內數省之屏蔽棄之恐轉資荷蘭 上

可其奏命籍之初置府一曰臺灣縣二曰臺灣曰諸羅

乾隆時改嘉
義分設彰化

曰鳳山以知縣理之又設兵備道一總兵

官一以統轄之飭戎備焉

開海禁

時沿海居民雖復業尙禁商舶出洋互市施琅等屢以爲言又荷蘭以曾助剿鄭氏首請通市許之而大西洋諸國因荷蘭得請於是凡明以前未通中國勤貿易而操海舶爲生涯者皆爭趨疆臣因請開海禁設粵海關海浙海江海權關四於廣州之澳門福建之漳州浙江之甯波府江南之雲臺山署吏以蒞之

乙丑康熙二十四年

夏四月黑龍江將軍薩布素圍雅克薩城

先是都統彭春征雅克薩城二十三年正月羅刹懼乞

降官軍獲其鳥槍以歸未幾羅刹潛據雅克薩如故

上命黑龍江將軍薩布素等統兵圍之阿達哈哈番馬喇言若取羅刹田禾則羅刹不久自困侍衛關保來亦以爲然

上諭令薩布素等酌議或由陸路進以所刈禾投江下流或水陸並進以所刈禾船載以歸已而薩布素等不能及時進取田禾 詔責之 特命都

統瓦山與薩布素等詳議以聞於是會奏我兵擬於四月杪水陸並進抵雅克薩城招撫如不納款則攻其城倘萬難克取卽遵前 旨毀其田禾以歸 上又諭

云兵非善事不得已而用之向者羅刹無故犯邊收我逋逃後漸越界而來擾害索倫赫哲飛牙喀奇勒爾諸

地剽劫人口搶擄村庄攘奪貂皮肆惡多端是以屢遣
人宣諭復移文來使羅刹竟不報命反擾害益甚爰發
黑龍江兵扼其往來之路羅刹又竊踞如故不送還通
逃應卽翦滅今大軍將逼臨雅克薩城姑再宣諭羅刹
倘仍抗拒則大兵相機而行四月官軍乘冰釋水陸並
進將神威將軍火器置前急攻之其頭目額克里舍勢
窮乞降克其城歸其人於雅庫舊部

丙寅康熙二十五年

秋九月 詔薩布素班師

是年正月羅刹復以五百人攜火器來據雅克薩依舊
址築城以居薩布素率所部二千人圍攻之死守不去

值荷蘭貢使在都稱與俄羅斯逼鄰乃賜書付荷蘭

轉達其汗時察罕汗已卒新察罕汗嗣立知中國東方

距已遼遠且限以行國非若西北之西費雅西南之圖

里雅卽普魯社今布國近在肘腋所必爭也於是商議復書海

道往還迅速九月復書卽至言中國前屢賜書本國

無能通解者今已知邊人構衅之罪自當嚴治卽遣使

臣詣邊定界請先釋雅克薩之圍許之遂詔薩布素

等退師

葉爾羌汗遣使來貢

葉爾羌在蔥嶺東漢莎車地順治初回疆各城尙皆有

汗皆元太祖次子哈薩岱之裔非回回族哈密有巴拜

汗吐魯番有蘇勒檀汗葉爾羌則阿布都汗皆以葉爾
羌爲大宗每表貢皆葉爾羌汗署名至是表貢稱臣成
吉思汗卽元太祖裔承蘇資滿業汗蓋是時尙未爲回酋所
有逮準噶爾攻破回疆各城後無復表貢

戊辰康熙二十七年

置定海縣

定海縣舊曰舟山一曰翁洲在寧波海中周百餘里卽
越句踐欲徙吳夫差甬東之地先是順治三年大兵定
浙東明監國魯王航海先至舟山守將黃斌卿不納遂
入閩明遺臣多附之五年其將張名振阮駿陷健跳所
王朝先旋攻斬斌卿於舟山迎魯王居之七年閩浙總

督陳錦言浙東舟山海寇及各寨山寇皆以故國爲名
狼狽相倚交通閩粵窺伺蘇松久爲東南之患請進兵
由定海關出海乘風潮半日可到攻其不備錦旋與都
統金礪等會兵進破四明諸山寨乘大霧渡海克其城
魯王遁赴廈門錦遂奏設陸兵千水師二千以守後又
爲鄭成功所破據官軍復攻克之提督田雄言舟山不
難於復而難於守請以滿兵駐防增戰艦補水師分汛
偵剿嗣因海警稍息議政王等言舟山本棄地守亦無
用應令都統率兵回京康熙二十三年巡撫趙士麟總
兵孫惟統疏言舟山爲寧郡藩籬請移定海總兵駐守
二十五年奏請設縣治至是建縣 賜名定海屬寧波

府而以舊定海縣爲鎮海

秋九月漠北喀爾喀蒙古各部來附

喀爾喀蒙古元太祖十五世孫達延車臣汗居於北庭

卽古北匈奴單于
庭元代稱和林

有子十一徙漠南者爲敖漢柰曼巴

林札魯克什克騰烏珠穆沁浩齊特蘇尼特九部其季

子格呼森扎賚爾仍留漠北析部眾分授七子爲七旗

分東西中三路各立汗掌之是爲土謝圖汗及車臣汗

札薩克圖汗三部其地東界黑龍江西界厄魯特北界

俄羅斯南訖瀚海以皆在漠北故喀爾喀終明代不見

於史 國初崇德時平漠南插漢部喀爾喀遣使貢名

馬甲胄元狐白貂鼠及俄羅斯火槍回部弓箠鞍轡阿

爾瑪斯斧

詔定歲獻九白之貢

白駝一白馬
八日九白

其後相

繼歸誠編入八旗駐京蒙古者為舊喀爾喀有順治中

及初元來歸

賜牧喜峯張家兩口外之札薩克左右

翼為內喀爾喀其外喀爾喀在漠北中葉專佞刺麻懈

武事所部復自相搆兵為厄魯特覬覦準噶爾汗噶爾

丹因之挑衅是夏遂大舉入其庭喀爾喀再戰再北三

部落數十萬眾瓦解先後東奔於是戴青台吉等二十

八人各率所部入邊請降

旨准於汎界內遊牧至是

士謝圖汗與其弟率兩翼台吉及澤卜尊丹巴胡土克

圖等入汎界乞降沿邊阿霸哈納諸台吉皆從之內附

已康熙二十八年

冬十二月俄人來歸雅克薩尼布楚城

先是俄羅斯使臣費岳多羅額克里謝等由陸路至喀

爾喀土謝圖汗境文移往復至是始與我領侍衛內大

臣索額圖等會議於黑龍江一循烏倫穆河一作綽爾納河相

近格爾必齊河上游之石大興安嶺以至於海凡山南

流入黑龍江之溪河盡屬中國山北溪河盡屬俄羅斯

一循流入黑龍江之額爾呼一作古納河爲界南岸盡屬

中國北岸盡屬俄羅斯乃歸我雅克薩尼布楚二城定

市於喀爾喀東部之庫倫立石於黑龍江兩岸刊泐會

議條款雜用滿漢拉提諾一作喇第納蒙古俄羅斯五體文

字於是東北數千里化外不毛之地盡隸版圖自後貿

易之使每歲間歲一至未嘗稍違節制

庚午康熙二十九年

秋七月 詔親征噶爾丹八月朔左翼兵大破之於烏蘭

布通

噶爾丹西域厄魯特四衛拉蒙古之綽羅斯部台吉也

篡殺兄僧格長子索諾木阿拉布坦而自立為準噶爾

汗以詐力兼并四衛拉

曰綽羅斯牧伊犁曰杜爾伯特收額爾齊斯河曰土爾扈特牧

雅爾即塔爾巴哈台曰和碩特牧烏魯木齊徙青海

又思北併喀爾喀使人激怒

土謝圖汗土謝圖汗執而殺之因藉詞報復揚言借俄

羅斯兵且至喀爾喀探無是事守備懈噶爾丹因領勁

騎襲破其帳土謝圖汗潰遁傾國大奔途遇我使臣張

鵬翮等往俄羅斯喀爾喀遣使乞援使臣以使事曉之
噶爾丹偵知我師不爲喀爾喀也復蹙之并擊破其左
右翼部及哲卜尊丹巴大刺麻等於是土謝圖三汗及
澤卜尊丹巴胡土克圖等部眾俱奔潰先後投我漠南
乞降噶爾丹亦遣使入貢遂得兼有回部青海漠北益
驕蹇 上敕還喀爾喀侵地率眾西歸不聽至是以

追喀爾喀逃人爲名選銳東犯侵及烏爾會河尙書阿
爾尼等以蒙古兵擊之失利侵及內札薩克 上遂

詔親征 命撫遠大將軍裕親王全福爲左翼安北

大將軍恭親王常寧爲右翼右翼遇賊於烏朱穆沁戰
復不利噶爾丹遂乘勝而南尋停止恭親王兵 命康

親王傑書會兵駐歸化城

上巡兵至博洛河屯

回鑾八月朔撫遠軍躡賊於烏闌布通大戰破其駢城
賊驚潰噶爾丹夜遁

辛未 康熙三十年

車駕幸多倫泊 受喀爾喀蒙古汗王朝

多倫泊

在獨石口外二百五十里

卽元上都地

上以新附喀爾

喀眾數十萬宜訓以法度先檄內外札薩克各蒙古皆
豫屯多倫泊百里外 車駕臨莅上三旗親軍營居中

八旗前鋒營二護軍營十火器營四分二十八汛環

御營而列傳

諭內外蒙古移近

御營五十里不得

入哨內屆期陳鹵簿

御帳殿於網城南

受朝 賜

宴次日

上躬擐甲胄大閱申嚴約束土謝圖汗等

具疏請罪宣

敕諭分左右中三路爲三十七旗割內

蒙古水草地俾游牧近邊仍留其汗號比內札薩克各
旗而建彙宗寺於其地以安其刺麻時噶爾丹與達賴
刺麻及厄魯特各台吉遣使上尊號卻之

國朝柔遠記卷二

國朝柔遠記卷三

臣 彭玉麟恭定

臣 王之春敬編

壬申康熙三十一年

詔免朝鮮常貢

先是征準噶爾時以火槍便利制勝因立火器營於是朝鮮國王進烏銃三千桿 詔永免朝鮮黃金及青藍紅木棉等貢

甲戌康熙三十三年

俄羅斯遣使入貢

時有二犯逃入俄羅斯俄羅斯遣人送回理藩院行文

國朝通志卷之三
一
獎之遂復遣使入貢 上閱其章奏 諭大學士曰
鄂羅斯人材頗健從古未通中國距京師甚遠自嘉峪
關行十一二日至哈密自哈密行十二三日至吐魯番
吐魯番有五種部落過吐魯番卽俄羅斯境聞其國有
二萬餘里漢張騫出使西域或卽彼處史載霍去病曾
出塞五千里想或有之今塞外尙有碑記可考至外藩
朝貢雖屬盛事恐傳至後世未必不因此反生事端總
之中國安甯則外釁不作故當以培養元氣爲根本要
務耳

丙子康熙三十五年

車駕復親征噶爾丹噶爾丹遁走

先是噶爾丹自烏蘭布通敗遁後仍侵掠我臣服之喀爾喀且害我使人而陰遣使誘內蒙古各部叛歸己

上恐勞師襲遠欲復致其來一戰覆之因密諭科爾沁土謝圖親王沙津遣人僞許內應噶爾丹果沿克魯倫河而下掠喀爾喀納木札爾陀音遂踞巴顏烏蘭因命安北將軍伯費揚古爲撫遠大將軍從歸化城進發揚威將軍覺羅舒恕西安將軍博濟振武將軍孫思克等由鎮彝取昆都倫一路前後起程皆爲西路將軍薩布素統盛京甯古塔黑龍江科爾沁兵沿克魯倫河進爲東路 上自統中路大兵出獨石口皆赴瀚海約夾攻沙磧不宜車乃畱大礮駝載子母礮每駐營

上親撫士卒行至滾諾爾遇雪從官及軍士服物由車運者及暮不至時一等侍衛海清從

上命海清

以駝載既至之內府帳房及食物柴炭分賜令棲息舉火軍士歡躍如慶更生

上又諭曰馬亦畏寒其肥

者猶可無恙其瘦者或致凍斃宜順風馳二三里許令人圍繞之使氣息漸溫則無妨矣可傳諭眾知之行至西巴爾台聞有俄羅斯助虜之信大學士伊桑阿力請回鑾

上怒曰朕祭告天地宗廟出征不見虜而返

何以對天下且大軍一退則虜盡銳向西路不其殆乎

遂躬率兵前行諸軍以次進發抵克魯倫河

上手

繪陣圖指示方略先遣使告以

駕至噶爾丹不信登

北孟納瀟山望見

御營黃幄龍燻環以幔城又外

爲網城軍容山立大驚拔營宵遁因命領侍衛內大

臣搜討近地

上親率前鋒追之三日至拖諾山而

還噶爾丹中途欲拒戰而眾奔不可止沿途遺棄老弱
輜重廬帳器械無算上駐蹕克勤和碩而命領

侍衛內大臣明珠盡運中路之糧以濟西師

夏五月撫遠大將軍費揚古大破噶爾丹於昭莫多

噶爾丹西走適西路兵遇之時我師度磧士馬飢疲難
馳擊費揚古謂非反客爲主以逸待勞不可乃距敵三
十里止營遣前鋒兵四百且戰且卻誘之至昭莫多遵
上所授方略皆下馬步戰約聞角聲始上馬而麾

國朝文選卷之三
三
左右翼步騎先據小山陣於東餘沿土臘河北陣於西
將軍孫思克以綠旗兵居中據山頂臨之賊爭山頂鋒
甚銳我兵據險俯擊弩銃迭發藤牌繼之每進輒以拒
馬木列前自固虜冒矢銃鏖鬪至暮不退費揚古遙望
虜陣後人馬不動察其婦女駝畜乃麾沿河伏騎一橫
衝入陣一襲其輜重山上軍奮呼夾擊大敗之夜追三
十里比曉收軍斬數千級降三千人獲馬駝牛羊廬帳
器械無算噶爾丹妻阿奴頡哲敢戰披銅甲佩弓矢騎
異獸似駝精銳悉隸麾下至是亦斃於礮噶爾丹以數
十騎遁

秋七月

命內閣翰林院修平定朔漠方略

時 上因嚙爾丹遁逐之盡境而止勒功於察罕拖
諾山及昭莫多之山班師凱旋御史阮爾訓疏言我
皇上御極以來如天覆育罔不率俾乃冥頑如嚙爾
丹自外生成致 聖主赫怒躬董六師親臨朔漠恩
威遠播算無遺策蓋自啟蹕以迄回鑾往返一百日之
內跋涉五千里而遙迅奏膚功丕揚神武爲從古帝王
所未有請宣付史館敬述方略勒成一書布之中外傳
示無窮 詔下禮部翰林議如所請是月遂 命內閣
翰林院等官修平定朔漠方略

秋九月葉爾羌回酋阿布都實特來降

嚙爾丹當強盛時攻破天山南路各城盡滅元裔諸汗

乾隆中蕩平準部時惟吐魯番舊頭目莽蘇爾
自喀喇沙爾來降外此西域已無蒙古遺種 其回教

祖謨罕驀德一作摩哈麥一作馬二十六世孫瑪墨特

已於明季與兄弟分適各國自墨德一作墨克古東踰

葱嶺居喀什噶爾乾隆時霍集占兄弟雖誅其先世子

孫散處西域各城人皆崇而奉之亦各有長時葉爾羌

回教酋阿卜都里實特亦為噶爾丹質諸伊犁至是噶

爾丹敗遂乘間率其子額爾克蘇爾唐脫身來降

上賜銀幣遣官送至哈密仍歸葉爾羌

丁丑康熙三十六年

春二月 命北平大將軍馬思哈撫遠大將軍費揚古征

噶爾丹 車駕幸甯夏

噶爾丹屢敗後精銳軍資喪盡回部青海哈薩克皆隔絕背叛欲西歸伊犁則畏兄次子策妄阿拉布坦之逼欲投俄羅斯俄人拒不受準部諸台吉絡繹來降噶爾丹窮蹙無計迺遣使納款行在探朝廷意詔數其罪令親身來降仍許以喀爾喀恩例待之而噶爾丹倔强終不至至是迺遣馬思哈費揚古分兩路進兵每路兵各三千每兵二名從僕一人馬五匹四兵合爲一伍帶百日口糧前進車駕復幸甯夏就近指授機宜

閏三月噶爾丹自殺部屬皆來降朔漠平

時車駕復自甯夏進駐白塔噶爾丹左右親信聞大

兵將至皆密款附噶爾丹遣其子塞卜騰巴珠徵糧哈

密為回人禽獻噶爾丹進退無地至阿察阿穆塔臺仰

藥死其下丹濟拉一作其姪丹吉喇以噶爾丹尸及其女鍾齊

海來歸餘眾盡降自是阿爾台山以東皆隸版圖拓喀

爾喀西境千有餘里而反喀爾喀於漠北增編為五十

五旗大臣請行慶賀禮 上曰噶爾丹之死乃天所

助昔喀爾喀窮蹙來歸不得不允其內附噶爾丹假此

構難犯我邊境是以爰整其旅為一勞永逸之計我師

所至無水之地而靈泉湧出不毛之土而庶草蕃蕪事

悉稱意今西北永甯其不致獲咎者幸矣宜先謝天

戊寅 康熙三十七年

夏四月減粵海關額稅

上諭大學士等廣東海關收稅人員搜括商船貨物概行徵稅以致商船稀少關稅缺額且海船亦有自外國來者如此瑣屑甚覺非體著減額稅銀三萬二百八十五兩著為令

置定海權關英吉利來互市

英吉利

粵東初稱英圭黎一作膺吃黎或作諸厄利

歐羅巴洲強國地本三

島孤懸大西洋迤東兩島相連南英倫

一作英蘭國都倫敦

一作

蘭頓在焉北蘇格蘭

一作斯葛蘭一作斯哥西亞又作師古泰

迤西別島曰

阿爾蘭

一作愛倫島又作伊爾蘭

三島各分數十小部旁各有羣島

東界荷蘭南界法蘭西海峽半日程北至大北海西至

大西海北極出地五十度至六十一度經綫偏東一度

至西十度有奇都臨但西河

一作坦米斯一作達彌塞河

宮室壯麗

舟車輻輳商貨充牣工藝精巧爲歐羅巴一大都會國

有大書院以聚學徒凡刑名星歷醫術藝事各有師學

多藏書文字用二十六字母切字多正字少旁行斜上

謂之拉體納書向奉克力斯頓天主教後改婆羅特士

頓爲耶穌新教人多長大白肌碧睛髮拳黃故亦稱爲

紅毛地產銅鐵錫煤呢羽其珍產異種多從商舶采自

遠洋土雖腴而地狹人稠歲以海舶移罪犯及窮民於

荒島給貲墾闢又奪據各島爲藩屬如外大西洋之北

亞墨利加洲西南之亞非利加洲海濱亞細亞洲之印

度及各島與東南洋之阿塞尼亞洲此洲在南極下西人最後得之為五

大洲即澳大利亞島凡數十處遠者距數萬里皆立市埠收貢稅

及種植而以海舶聯絡之故在西洋諸國尤稱雄富其

國古為土番部落後有北狄峩特族據之漢時羅馬渡

海略定其地屬意大里者四百餘年六朝時峩特族卑

勒敦據之為據蘇格蘭之斯各多比德斯兩部所攻求

援於安各羅安各羅亦峩特族兵強地偪因脅降之後

分為七唐貞元中有豪酋平七國為一後大尼即噠國復

據之宋眞宗時英北族有酋曰威廉一作給列爾美請命羅馬

教皇伐大尼破之遂王本國嗣王顯理第二克伊琳大

洲即阿爾蘭元至正中併蘇格蘭國旋分為二明初國屢亂

以改尙西教即耶穌新教與西班牙相攻勝之勢遂振萬歷

間有女主卒無子英人奉蘇格蘭王嗣位二國合一稱

英吉利古不通中國至天啟間始有聞又未來華故不

見明史順治初其王遇弒嗣王強民習洋教即天主舊教不

從招荷蘭王率兵至荷蘭王遂入即王位是為威廉第

五自後國勢益振及臺灣平開海禁設四權關浙海關

在甯波商船出入海港往返百四十里中多礁石每回

帆逕去英吉利貨船時往來澳門廈門復北泊舟山即定

海甯波海關監督屢請移關定海縣部議未許至是監

督張聖詔以定海港澳闊深水勢平緩堪容番舶亦通

各省貿易請捐建衙署移關以便商船當增稅銀萬餘

詔可乃於定海城外道頭街西建紅毛館一區以安置夾板船水梢人等此英吉利商船來定海之始然時雖通市亦不能每歲來華也

己卯 康熙三十八年

四川提督唐希順克打箭鑪

打箭鑪在四川西徼明正土司所屬地高寒因山爲城西通裏塘巴塘達西藏時西陲多擾提督唐希順遣守備王允吉等率兵攻克之以其地爲番夷互市通貢總匯入藏驛路所經因定界於中渡

庚辰 康熙三十九年

俄羅斯遣使齎表至

俄羅斯使臣齎表至京師

上諭大學士曰俄羅斯

地方遙遠僻處西北海之隅然甚誠敬噶爾丹窘迫求
救於彼曾拒而不荅曩者遣人分畫疆界即獻尼布楚
地以東為界尼布楚等處原係布拉忒吳郎海諸部落
地彼皆林居以捕貂為業人稱為土中人後俄羅斯疆
盛并吞之能遂獻還允當軫念也

癸未 康熙四十二年

額濟納土爾扈特人來降

土爾扈特種人在額濟納者見朔漠盡平亦相率來降

詔編置一旂與阿拉山

即賀蘭山

厄魯特蒙古同游牧甘

涼塞外

乙酉康熙四十四年

冬十一月 詔翰林院習外國文字

時大學士等以俄羅斯貿易來使齎至原文繙譯進呈
上閱之 諭曰此乃拉提諾託多烏祖克俄羅斯
三種文也外國文有三十六字母者亦有三十字五十
字母者朕交刺麻詳考視之其來源與中國同但不分
平上去聲而尙有入聲其兩字合意甚明中國平上去
入四韻極精兩字合音不甚緊要是以學之者少漸至
棄之問翰林院四聲無不知者問兩字合聲則不能知
中國所有之字外國尙知之特不全耳此後翰林院宜
學習外國文字

戊子 康熙四十七年

秋七月免暹羅貢使貨稅

暹羅國王森列照拍廣拍馬噶陸坤司由提邪菩埃遣陪臣入貢 詔貢使所攜貨物免徵其稅

己丑 康熙四十八年

秋七月許商船由內洋販米赴甯波紹興

時浙江巡撫黃秉中疏言甯波紹興等處連歲歉收米價騰貴計惟招商可平市價而溫台二府豐收米賤格於出洋之禁請許商民由內洋販運以濟甯紹從之

辛卯 康熙五十年

土爾扈特遣使入貢

土爾扈特本厄魯特四瓦刺部一作衛拉即之一其游

牧地曰雅爾即今塔爾巴哈台為元脫歡及也先裔明季所部

和鄂勒汗與鄰部有釁率其子書岱青等投俄羅斯俄

羅斯以其行國也指裏海額濟勒河之南圖里雅即普魯社

東哈薩克北無城郭地使之游牧其舊地則輝特部居

之至和鄂勒曾孫阿玉奇仍回舊部嗣汗以女妻策妄

策妄離間其子散札布率萬五千戶來伊犁盡沒入之

而逐散札布阿玉奇遂全部仍投俄羅斯至是聞準噶

爾敗亡遣使假道俄羅斯來貢 上欲悉其要領旋

遣兵部郎中圖理琛等往報之假道俄羅斯經西悉畢

爾及喀山兩斯科使臣過境其邊臣以察罕汗命致禮

餽以兵護行往返三載以五十四年三月歸備記所經

為異域錄數萬言繪圖呈覽其河道大者曰色棱格

河曰厄爾齊斯河皆發源中國色棱格河出漠北阿爾泰山東額爾齊斯河出

阿爾泰山流入北海其近北海處夏至無夜冬至無晝後

俄羅斯人至亦稱其地去北極二十度以上為北海墜

冰凝結人不能至云

癸巳 康熙五十二年

春二月海盜程尙義降

是月 上諭朕昨問投誠海賊程尙義伊等出洋行

劫遇西洋船懼其火器不敢逼近惟東洋船則掠其銀

米亦不盡取以此商船仍往來不絕中國與西洋地方

俱在赤道北四十度內海洋行船中國人多論更次十六
里爲一更西洋人多論度數自彼國南行八十度至大浪山

始復北行入廣東界常六閱月在海中不見一山又自

西洋至中國有陸路可通因隔俄羅斯諸國行人不便

故皆從水路俄羅斯距京都約萬二千里西洋及土兒

虎特卽土爾扈特地方皆與俄羅斯接界俄羅斯倚土爾扈

特馬匹土爾扈特助之大敗雪西洋又西去溫多斯坦

布海兒夜兒根等處產棉製甲四十層可敵浙江棉八

十層曾以鳥槍試驗知之又過哈密六百里有吐魯番

去雪山百餘里其人晝伏至夜始出耕種地甚熱而多

石日出時耕種輒熱死又哈薩克卽古陽關地其人性

國朝文獻卷三十一
二
好鬪常結隊以殺擄爲事人心亦智若婦女被人擄去必乘間手刃其人而回地亦熱草極肥盛馬皆汗血所產蘋果葡萄梨等物皆大而美又西北回子種類極多皆元後裔又有一支化小西洋約十萬人皆住帳房惟北極下最寒往時有人築室而居明年往觀之已無復存者但見林間雪深數丈而已昔人云北海有積冰數百丈信不誣也

丁酉康熙五十六年

廣東碣石鎮總兵官陳昂請禁開堂傳教

初嚴傳天主教之禁各省私設教堂未奉追毀又以西人得自行其教日久法弛漸相煽惑總兵官陳昂因言

天主一教設自西洋今各省開堂聚眾此輩居心叵測
目下廣州城內外尤多加以洋船所匯同類招引恐滋
事端乞循例嚴禁毋使滋蔓從之

戊戌
康熙五十七年

秋九月 命皇子允禩爲撫遠大將軍屯青海

征準噶爾也先是噶爾丹自殺其下丹濟拉以其尸并
其女來歸其兄次子策妄阿拉布坦初逃居土魯番遣
使乞降已而乘隙收集伊犁遂奪其尸以獻 上以

策妄方親附又其地遼遠費轉輸遂畫阿爾台山

卽庚金山

以西俾游牧復成西域大部落遂思併厄魯特爲一杜
爾伯特先已附之於是迫逐土爾扈特汗阿玉奇父子

仍投俄羅斯又贅和碩特汗拉藏之子丹衷於伊犁而
使大策零敦多卜於先年秋潛兵由騰格里入西藏襲
殺拉藏汗遂自立爲四部總汗是月又覆我將軍額倫
特侍衛色楞援藏之師於喀喇河 上恐其左右憑

陵將不可制於是 命皇十四子允禩爲撫遠大將軍
視師青海南北路諸軍皆從大將軍取進止旋起程暫
駐西甯

以楊琳爲兩廣總督

琳疏言西洋人開堂設教其風未息請循五十六年例
再行禁止報可

己亥 康熙五十八年

夏六月永甯協副將岳鍾琪撫定裏塘巴塘

四川打箭鑪西三百餘里爲裏塘又西數百里爲巴塘
皆通西藏西甯雲南孔道各有土司舊屬前藏時策零
據藏番酋多爲所誘大軍將進討都統法喇令副將岳
鍾琪領綠旗先抵裏塘其酋日達哇等語不遜鍾琪乘
其無備擒送首逆七人斬之隨宣 詔撫諭進收巴塘
令成都教諭楊世祿先招撫其酋結果翁布二人遂齎
其土地戶口冊籍詣軍降

庚子康熙五十九年

春正月

詔大軍護噶爾藏達賴刺麻赴西藏

第五世羅卜藏達賴刺麻之卒也其第巴

官名桑結欲專

國不使班禪刺麻代持教欲使眾尊己遂匿不發喪唆
噶爾丹使覆喀爾喀及噶爾丹敗竄又使其胡土克圖
濟隆代爲乞和以誘我追師及 詔加詰責始惶恐具
奏而立紅教之僞刺麻與策妄及拉藏汗交惡拉藏誅
桑結而立博克達山之刺麻爲達賴青海諸蒙古不之
信別以裏塘之噶爾藏嘉穆錯爲真達賴擁至西甯塔
爾寺坐牀兩部爭議未決策妄已遣策零敦多卜侵藏
襲殺拉藏汗而禁其所立新刺麻及覆我援藏之師

上乃封噶爾藏爲宏法覺眾第六輩達賴刺麻 賜

冊印 命平逆將軍延信等自青海率滿漢兵及諸蒙

古汗王台吉等送之入藏 命護軍統領噶爾弼爲定

西將軍率兵自打箭鑪出軍容甚盛

免西洋人德克里罪

初以妄行陳奏獲罪 詔從寬禁錮未幾赦之

秋九月大軍入西藏賊將策零敦多卜遁回伊犁西藏平

大軍既進賊將敦多卜自拒中路凡三襲我軍皆敗走

將軍噶爾弼自南路進至察木多即前藏奪橋據險欲俟

中路兵偕進恐期久糧乏用副將岳鍾琪計即招土司

前驅集皮船以渡直趨布達拉即中藏分兵斷賊饜道沿

途招降番日傳大小第巴各廟刺麻宣示拯救至意時

北路牽制之師將軍富甯安傅爾丹祁里德等亦分途

進擊準噶爾邊境降其宰桑焚其積蓄獲牲畜萬計敦

卜多無援應又腹背受敵遂大潰由騰格里舊路騰格里海

在布達拉西北其北岸大山有鐵索橋之險策零侵藏所經竄還伊犁得達者無幾

兩軍既會於藏搜討偽藏王達格咱賊目藍占巴及宰

桑刺麻助逆者諸蒙古汗王台吉遂擁新達賴登座

詔賜以土地人民而取博克達刺麻歸京師以拉藏舊

臣貝子康濟鼐掌前藏台吉頗羅鼐掌後藏事蓋自五

世達賴刺麻卒後羅卜藏卒於康熙壬戌年西陲擾亂三十餘年至

是始定 御製文紀事勒石大招寺大招寺在布達拉之薩喇城為西藏

諸城之首寺為唐公主所建為駐藏大臣會諸貝子大刺麻議事之所時將軍有乘勝來

年大舉之請因哲卜尊丹巴刺麻代策妄請罪 諭令

自戢暫停進兵西藏既定於是 遣理藩院主事勝住

偕刺麻楚爾沁等往圖西徼外山川以阿里西三百餘

里之岡底斯為天下眾山水之根蓋即葱嶺南幹時回疆未

收故疑岡底斯即昆崙

壬寅 康熙六十一年

暹羅運米至蠲其稅

時暹羅貢使言其地米甚饒裕銀二三錢可買稻米一

石 詔令分運米三十萬石售於閩廣浙江免收其稅

癸卯 雍正元年

安置西洋人於澳門

閩浙總督覺羅滿保奏稱西洋人雜處內地在全省起

天主教邪教徧行聞見漸淆人心漸被煽惑請將各省

西洋人除送京効力人員外餘俱安置澳門其天主堂
改爲公廨誤入其教者嚴行禁飭奉 諭遠夷住居各
省已歷年所今令其遷移可給限半年委官照看毋使
地方擾累沿途勞苦

甲辰 雍正二年

春二月撫遠大將軍年羹堯奮威將軍岳鍾琪征叛酋羅
卜藏丹津破走之青海平

青海在西甯府西瀦水七百餘里

海中有二島不通舟楫惟冰合可通卽古

弱水西回疆南衛藏北玉關表延二千里古西戎地漢爲

鮮水諸羌後爲吐谷渾唐末入吐番始隸衛藏崇佛教
明封番酋爲禪師國師復併入套酋俺荅後元裔和碩

特部和碩特亦厄魯特四部之一

固始汗自西域來據之南併衛藏

國初崇德中遣使自塞外通貢順治初導達賴刺麻

入 覲受 封 賜金冊印旋卒有十子一在套西一

在西藏居青海者八部叛服不常及噶爾丹襲殺鄂齊

圖汗固始汗兄弟子 青海和碩特諸台吉懼稍內附康熙中

駕幸甯夏時宣 諭八台吉皆入 覲 詔封固始汗

子達什巴圖為親王餘授貝勒貝子公有差為近藩及

達什巴圖子羅卜藏丹津襲爵從大軍定藏歸以唐古

忒及青海舊皆和碩特屬部已為固始汗嫡孫仍冀總

長諸部於元年夏誘諸部與盟令復故號而自號達賴

渾台吉以脅諸部不從者加以兵親王察罕丹津遂內

奔河州關外又誘青海大刺麻察汗諾們汗使從己諸

番刺麻等同時騷動寇掠西甯 詔侍郎常壽往諭為

所執 上乃 命川陝總督年羹堯為撫遠大將軍

四川提督岳鍾琪為奮威將軍討之羹堯先分兵防其

內犯又守險扼其入藏及通準噶爾之路遣諸將分攻

潰其黨羽各蒙古貝勒貝子公等多來歸降其脅從部

落十餘萬是年正月鍾琪進攻黨賊刺麻沿途焚其寨

堡寺舍斬馘六千惟丹津負嶠於柴木達 距西甯一 羹

堯請調兵四萬分四路進攻 西甯松潘汪 鍾琪請乘春

草未生以精兵五千馬倍之兼程擣其不備 詔從鍾

琪策是月出師先後殲殪其守險偵伺之賊賊無哨探

乃蓐食銜枚宵行百六十里黎明抵其帳賊猶未起倉
皇大潰丹津衣番婦衣騎白駝遁官軍循河源西窮追
至桑駝海無路而返而丹津已橫越戈壁投準部矣俘

其母妻弟妹逆目斬馘八萬降數萬擄獲無算往返兩
月 詔封羹堯一等公鍾琪三等公勒碑太學鍾琪旋

進勦黨賊土番於莊浪衛西山即唐石堡城禽斬大半賊蹙

乞降又乘時勘定西甯番奏倣土司設番目隸廳衛而

增置大通安西河州柳溝各衛改西甯衛爲府青海辦

事大臣駐節於此追繳諸番兵器及明國師印敕限每

寺刺麻毋過三百關青海地千餘里分 賜各蒙古

暹羅貢稻種果樹

暹羅貢船內梢目水手九十六人本中國人貢使求免
回籍許之

夏六月定來粵洋商船額數

通政司右通政梁文科奏查香山縣澳門地方明季嘉
靖間租與紅毛居住屢年來戶口日增居心未必善良
不可不嚴加防範以杜隱憂今宜設一弁員在澳門彈
壓凡外洋人往來貿易不許久畱並不許內地奸民勾
通爲匪則地方安靜庶不致有意外之虞奉 旨交兩
廣總督孔毓珣詳細訪詢籌計妥確以聞毓珣回奏臣
查其地原有香山協把總一員帶兵五十名防守又澳
門內旱路十餘里地名前山寨設有城池關門不容西

洋人擅入內地現有都司守備領兵駐防四面妥設礮臺控制是原有官兵彈壓惟嚴飭用心巡查無庸另議安設矣惟是康熙五十六年定例禁止南洋不許中國人貿易澳門因係夷人不禁獨佔其利近年每從外國買造船隻駕回貿易船隻日多恐致滋事臣擬查其現有船隻仍聽貿易定爲額數朽壞准修此後不許添置以杜其逐歲增多之勢至外國洋船每年來中國貿易者俱泊省城黃埔地方聽粵海關徵稅查貨並不到澳門灣泊報可

秋九月山東巡撫陳世倌請禁回教不許

東撫陳世倌疏言左道惑民律有嚴禁如回教不敬天

國朝文獻通考卷三十一
六
地不祀神祇另立宗主自爲歲年黨羽眾盛濟惡害民
請概令出教毀其禮拜寺
上諭此種回教原無一

可取但其來已久且彼教亦不爲中土所崇尚率皆鄙
薄之卽彼教中稍有知識亦似有不得已之情從無平
人人其教門之理則彼所謂教者亦止此數非蔓延難
量之事至彼之禮拜寺回回堂亦惟彼類中敬奉而已
何能惑眾朕令汝等嚴禁眩幻駭人動眾之事如僧道
回回刺麻等其來已久今無故欲一時改革禁除不但
不能徒滋紛擾有是治理乎未知汝具何意見也

冬十月安置西洋人於廣州

時

上諭孔毓珣如西洋人之安插亦未甚妥外來

之洋船發放尤屬不當今命爾總督其地其盡心竭力
一一料理毓珣奏稱查各省居住西洋人先經閩浙督
臣滿保題准有通曉技藝願赴京効力者送京此外一
概送赴澳門安插嗣經西洋人戴進賢等奏懇寬免逐
回澳門發臣等查議臣思西洋人在中國未聞犯法生
事於吏治民生原無大害然厯法算法各技藝民間俱
無所用別爲一教原非中國聖人之道愚民輕信誤聽
究非長遠之計經臣議將各省送到之西洋人暫令在
廣州省城天主堂居住不許出外行教亦不許百姓入
教遇有各本國洋船到粵陸續搭回此外各府州縣天
主堂盡行改爲公所不許潛往居住業會同將軍撫提

諸臣具題其澳門居住之西洋人與行教之西洋人不
同居住二百年日久人眾無地可驅守法納稅亦稱良
善惟伊等販洋船隻每從外國造駕回粵連前共二十
五隻恐將來船隻日多呼引族類來此謀利則人數益
眾臣擬將現存船隻編列字號作爲定數不許添造並
不許再帶外國之人容畱居住亦經具疏請 旨此安
插兩種西洋人是否妥協伏候 聖裁再外來洋船

向俱泊於近省黃埔地方來回輸納關稅臣思外洋遠
來貿易宜使其懷德畏威臣飭令洋船到日止許正商
數人與行客公平交易其餘水手人等俱在船上等候
不得登岸行走撥兵防衛看守定於十一十二兩月內

乘風信便利將銀貨交清遣令回國則關稅有益而遠人感慕亦不致別生事端矣奉 諭朕於西洋教法原無深惡痛絕之處但念於我中國聖人之道無甚裨益不過聊從眾議耳爾其詳加酌量若果無害則異域遠人自應一切從寬爾或不達朕意繩之過嚴則又不是矣

乙巳 雍正三年

春二月 詔安輯臺灣降番

先是福建巡撫黃國材於二年十一月疏報臺灣鳳山縣南路山前生番歷歷等五社北路山後生番八里岡等六十五社諸羅縣北路山前生番本祿等四社男婦

國朝彙編卷三
五千七百九十九名口歸化至是續報臺灣彰化縣內
山巴萊遠麻著獅子頭等社生番男婦八百五十一名
口歸化尋奉 上諭生番野性難馴全在地方文武
官弁安戢得法封疆大吏當嚴飭屬員施恩布教令其
心悅誠服永無變更方不愧柔遠之道

秋九月禁民入番船

本年六七月間粵東到英吉利洋船三法蘭西洋船一
皆載黑鉛番錢羽緞哆囉囉噤諸貨又續到哥沙國咖
喇吧國嗎吧喇斯國洋船英吉利洋船皆載胡椒檀香
蘇木黑鉛停泊黃埔總督孔毓珣奏請委員彈壓稽查
不許內地間雜人等擅入夷船生事併嚴飭牙行公平

交易務在年內乘風信盡令開發歸國奉 旨嚴加約
束不可寬縱

丁未 雍正五年

蘇祿入貢

蘇祿國在南洋小呂宋羣島西南婆羅洲東北地當赤
道下三島相連島甚渺小惟兼有婆羅洲東北隅地由
廈門往水程百一十更產明珠玳瑁蘇木降香藤條鸚
鵡戶口頗繁而民食不足本巫來由繞阿番族勇悍善
鬪民多習爲海盜地饒瘠食不足糴於別島廈門商船
至蘇祿水程百二十更國有東西峒三王明永樂中并
率妻子來朝後併爲一西班牙旣據呂宋再以兵攻蘇

國朝文獻通考卷三十三
三
祿反爲所敗是年其王遣使至閩貢方物並求內附

上以其險遠不許

春三月開閩省海禁

閩督高其倬疏言福興漳泉汀五府地狹人稠自平定臺灣以來生齒日繁山林斥鹵悉成村落無田可耕流爲盜賊勢所不免臣再四思維惟廣開其謀生之路如開洋一途前經嚴禁但察富者爲船主商人貧者爲頭舵水手一船幾及百人其本身既不食本地米糧又得沾餘利歸養家屬若慮盜米出洋則外洋皆產米慮透消息則今廣東船許出外國豈福建獨虞洩漏慮私販船料則中國船小不足資彼之用似開洋於地方有益

請弛其禁尋下廷議行

夏四月葡萄牙入貢

葡萄牙卽布路亞

一作博爾都噶亞
一作波耳都欺

歐羅巴極西小國

北界西班牙

卽大呂宋一名
日斯巴尼亞

西南臨大西洋北極出地

三十七度至四十二度英綫偏西九度至十二度國有

三大江皆源自西班牙有二學歐羅巴高材多出其中

土產果實絲綿善釀葡萄酒其地古名盧西達尼本西

班牙西境後爲回國所併三百餘年宋紹聖時西班牙

恢復故土有臣曰英黎給將兵有功王妻以女以盧西

達尼數城封之其子襲位攻破回部拓地漸廣國人奉

以爲王是爲葡萄牙開國之祖後與西班牙並立明嘉靖

間有賢王以馬努以利能立法制稱極治至孫英黎吉
當萬歷八年阿非利加洲回部來侵戰沒無子國仍爲
西班牙所并隸者六十年西政貪殘葡人起兵逐守者
復立故王支屬與西構兵二十餘年賴英吉利起兵助
之國迺僅存先是歐羅巴諸國元代以前罕通別土葡
人精天文麻算用儀器測量星日躔次度數知水陸方
向遠近宏治間國王遣善操舟者駕巨艦望南駛行循
阿非利加西洲之西沿海越赤道下遶大浪山卽吸東
朴
北行歷阿非利加東境抵五印度國復東駛至麻六甲
又從蘇門答臘噶羅巴海峽徧歷東南洋諸島所至輒
畱葡人立新埔正德十一年先後至中國舟山甯波泉

州隆慶初至廣東香山縣濠鏡

即澳門

請隙地建屋歲納

租銀五百兩時上方珍玩皆中涓取辦於粵當事利其

居積寶貨便供給總督林富代為請葡人遂築樓館營

埠市於澳是為歐羅巴通市粵東之始後西班牙荷蘭

法蘭西英吉利諸國相繼東來爭闢新埠葡亦建藩部

於南亞墨利加洲嗣因國內亂其小西洋東南洋各埠

咸被諸國侵奪僅餘澳門為諸國東來之逆旅萬歷初

意大里人利瑪竇來華士大夫方與講求麻法葡人亦

以能治麻聞朝議改用新法亦居其人於澳門故粵人

稱居澳者為大西洋其國終明代未嘗朝貢至是遣使

臣麥德樂表貢方物抵粵巡撫楊文乾遣員伴送至京

召見 賜宴於常賚外 特賜人蔘緞匹瓷漆器紙
墨字畫絹燈扇香囊諸珍加 賞使臣旋 命御史常
保住伴送至澳遣歸國麥德樂在澳天主堂率洋商誦
經行禮恭祝 聖壽

議入天主教烏爾陳等罪

時已革宗室貝勒蘇努子烏爾陳蘇爾金庫爾陳以結
黨亂政後私入天主教 廷議請卽正法奉 上諭

烏爾陳等不遵滿洲正道崇奉西洋之教朕令伊等悛
改遣王大臣等分晰開導乃伊等固執不願悛改如此
昏庸無知與禽獸奚別何必加以誅戮烏爾陳等非力
能搖動政事斷不可姑容於世者可比此等人正法與

否並無關係今王大臣等因蘇努父子從前所行大逆不道請將烏爾陳等卽行正法所奏雖是但朕從前已將伊等之罪暫行寬宥今復將伊等正法西洋人不知其故必以爲伊等因入西洋教被戮轉使伊等名聞於西洋著將烏爾陳等交與步軍統領阿齊圖擇一地方牢固鎖禁俾得窮究西洋道理如知西洋敬天之教自然在朕前奏請改過也

宣諭釋道天主等教同異

佛誕之日適與西洋國使臣表賀事相值 上因

諭廷臣云向來僧道家極口詆毀西洋教西洋人又極詆佛道之非互相訛謗指爲異端此皆以同乎己者爲

正道異乎己者爲異端非聖人所謂異端也孔子曰攻乎異端斯害也已孔子豈以異乎己者概斥之爲異端乎凡中外所設之教用之不以其正而爲世道人心之害者皆異端也如西洋人崇尙天主天以陰陽五行化生萬物故曰萬物本乎天此卽主宰也自古有不知敬天之人不敬天之教乎如西洋之敬天有何異乎若曰天轉世化人身以救度世此荒誕之詞乃借天之名以蠱惑狂愚率從其教耳此則西洋之異端也朕意西洋立教之初其人爲本國所敬信或者尊之如天倘謂立教之人居然自稱爲天主此理之所無也釋氏以清淨無爲爲本明心見性爲功若必棄置倫常同歸寂滅更

妄談禍福煽惑凡庸藉口空門潛藏奸宄此佛教中之
異端也儒者守先王之道讀聖賢之書庶民奉爲坊表
倘以詩書爲弋取功名之具科目爲廣通聲氣之途或
逞流言邪說以動人聽聞或工豔曲淫詞以蕩人心志
此則儒中之異端也凡中外設教之意未有不以忠君
孝親獎善懲惡戒淫殺明己性端人品爲本其創設之
人自非凡夫俗子必有可取方能令人久久奉行至末
學後人敷衍支離而生種種無理謬說遂成異端矣彼
西洋之教不必行於中國中國之教豈能行於西洋如
蘇努之子烏爾陳等愚昧不法之輩背祖宗違朝廷甘
蹈刑戮而不恤豈不怪乎西洋天主化身之說尤爲誕

幻天主旣司合於冥冥之中又何必託體於人世若云
奉天主者卽爲天主後身則服堯服誦堯言者皆堯之
後身乎此則悖理謬妄之甚者也西洋人精於麻法國
家用之且其國王慕義抒誠虔修職貢數十年來海洋
甯謐其善不可泯蒙古之尊信佛教惟言是從故欲約
束蒙古則刺麻之教亦不輕棄而不知者輒妄生疑議
乃淺近狹小之見也總之人心不公見理不明以同己
爲是異己爲非互相誹譏幾同仇敵不知人品類不齊
習尙不一不能強異亦不能強同且各有長短惟存其
長而棄其短知其短而不昧所長則彼此可以相安方
得聖帝明王明通公溥之道而成太和之宇宙矣

六月禁內地民久畱外洋

先是康熙末以噶羅巴及呂宋皆紅毛西洋泊船之所藏匿盜賊甚多內地民希圖獲利往往畱在彼處有旨交廷臣議准其附洋船帶回內地至是奉諭云

聖祖仁皇帝綏靖海疆且不忍內地之民轉徙異地實仁育義教之盛心但數年來附洋船回者甚少朕思此等貿易外洋多係不安本分之人若聽其去來任意不論年月久遠伊等益無顧忌輕去其鄉而飄流外國者益眾矣嗣後應定期限若逾限不回是其人甘心流移外方無可憫惜朕意不許令其復回內地如此則貿易之人不敢稽遲在外矣

秋九月與俄羅斯訂恰克圖互市界約

俄羅斯察罕汗卒後其妃代臨朝為叩肯汗遣使臣薩

瓦暨俄官伊立禮與我理藩院尙書圖禮善喀爾喀親

王策凌在恰克圖議定喀爾喀北界自楚庫河以西沿

布爾固特山至博移沙嶺咸豐八年中俄和約載有雍正六年所立沙賓達巴哈之

界碑當即此地為兩國邊境而互市於恰克圖議定陳兵鳴礮

謝天立誓庫倫檔案載雍正五年七月十五日兩國大臣議定由恰克圖鄂爾懷圖兩處中間界址

所立之鄂博起橫至西邊鄂爾懷圖色楞格河起至沙

畢迺嶺共立鄂博二十四處由布爾固特依山南巴彥

梁起至東邊額爾古納河源之阿巴哈依圖山分界共

立鄂博四十八處後嘉慶二十三年會勘一次有手具

定俄人來京就學額數

俄羅斯國界近大西洋者崇天主教其南境近哈薩克者崇回教其東境近蒙古者崇佛教康熙間嘗遣人至中國學刺麻經典以綏東方之眾並遣子弟入國子監習滿漢語言文字居舊會同館派滿洲助教一人漢助教一人教習之至是定俄人來學刺麻者額數六人學生額數四人十年更代爲例

冬十月平臺灣叛番

高其倬疏報臺灣水連沙等社兇番自康熙六十年朱一貴作亂後不納賦餉肆行劫掠臣令臺廈道吳昌祚等率弁兵番壯分路裹糧進勦擒首惡骨宗等各社相繼歸誠

國朝柔遠記卷三